


TH. BARTHOLINI  
DISSERTATIO ANA-  
TOMICA

de

# HEPATE DEFUNCTO

Novis Bilisianorum obser-  
vationibus opposita.



H A F N I Æ,

Excudebat CHRISTIAN. WERING. Acad. Typ.

Sumptibus PETRI HAUBOLDI

ANNO 1661.



TH. BARTHOLINI  
*Dissertatio Anatomica*  
**DE HEPATE DE-**  
**FUNCTO**

ad

*Celeberrimum Virum*  
**D.D. ANTONIUM**  
**DEUSINGIUM**

*Medicina in Incluta Acade-*  
*mia Gröningana Professore*

*Primum, Principisq, ibidem Guber-*  
*natoris & Provinciae*

*Archiatrum.*



Ajorem & à me & publico gra-  
 tiam meruisses, Clarissime Deu-  
 singi, si neglectis Bilsianarum  
 partium factionibus, sub proprio

A a

vec

vexillo, experimentis proprijs & rationibus pro Hepate Defuncto reducendo aciem contra me iastruiffes. Jam infestiora mihi videntur, quæquam minus terroris incutiant, quæ non semel forti animo tela excepi & sustinui ex illius pharethra, quem tanti esse credidisti, ut patrocinium illius in Te susciperes. Mirantur mecum alij quibus publicis in Medicam Rempublicam meritis innotuisti, quæ causa Te ad illius admirationem & cultum impulerit, cujus artes obscuræ, Prætorio tamen jure sibi apud omnes auctoritatem imperat. Scilicet ægerrimè Nobilis ille tulit, quod argumentis nullâ prorsus bile conspersis dubia nonnulla in *Spicilegio secundo* proposuerim, antequam pleno consensu in sententiam illius descenderem; hinc convitijs liberali manu me meamque famam oneravit, & per subornatos, liberosque verbis acerbis graves obruere conatus esset, si vel minis vel tyrannide aliquâ liberi spiritus homo & extra illius imperium constitutus, potuisset debellari. Te verò an nobilitas illius terruit, ut inter clientes & adulatores ejus numerareris, invidiamque alienam in Te transcriberes? Non inducor ut id credam, Nam in libera Re-

publica versaris, & nobilem quoq; tutemq;  
animum geris. Rectè *Petronius* :

Una est nobilitas argumentumq; coloris

Ingenui, timidas non habuisse manus.

An miraculorum magnitudo oculos  
tuos perstrinxit, quæ orbi promittuntur?  
Certè jam ea vilescunt & penè evanescent.  
Multos artificium illius in stuporem rapuit,  
quo præparata corpora à putredine, velut bal-  
samo condita, fertur conservare. Sed speci-  
osa promissa eventus destituit. Scripsit enim  
nuper ad me amicus, balsamica ejus corpora  
nunc valdè madere, nunc justò sicciora, velut  
pulverulenta videri, quam diu igitur sint du-  
ratura, judicent salis & aluminis naturæ  
gnari, quorum quoq; beneficio brevi artifi-  
cium illud publicè prostabat quod magnopre-  
tio Principi cuidam Germano divendidit mer-  
cator nobilis, ut spes sit ad plures secreti hu-  
jus notitiam dimanaturam. Quod si inte-  
rea balsamica corpora admirari velis, ad nos  
quæso transcurrere, ut Venstermanni Nobi-  
lis Mumiam curiosis oculis speculeris. Per-  
texui illius Historiam Cent. 1. Anat. Rar.  
Hist. 62. Ex illo tempore uxoris quoq; Ven-  
stermannianæ locus feralis fuit apertus à  
milite spe prædæ & defossi thesauri, reper-  
tumq;

tumq; cadaver prorsus integrum, aridum & omnibus suis partibus illæsum. Sedulâ operâ utriusq; cadaver iterum perlustravi, ut pleniorè fidacia insuetum ostentum ad Te perscriberem. Effluxerunt anni LXX. & amplius post illius sepulturam, post hujus verò obitum anni XXXII. Utriusq; tamen jam eadem siccitas, magnitudo, forma, color idem, pernæ fumo induratæ similis, sed pondus adhuc diuersum, quanquam enim facile utraq; mumia à nobis portari manibusq; elevari possit, femina tamen gravior est, forsan quod inconspicua oculis nostris humiditas adhuc intus lateat. In viro crinium rubrorum vestigia conseruantur, Ungues tamen in utraq; deficiunt in pedibus manibusq; quia tendinibus exsiccatis & contractis contineri suo loco nequiverunt. Causam necdum assequutus sum quæ hæc sola cadavera incorrupta tuctur. Vespillo templi rogatus, negavit vel in cœmiterio vicino, vel sepulchris templi aliis, præter ossa ex cadaveribus quicquam comparere. Patet hujus cryptæ subterraneæ fenestra meridiem versus, & effossum solum est argillaceum, an verò hinc promumiis hætenus conservatis aliquid lucis asfulgeat, Tu, Vir naturæ perite, apud Te deli-

deliberabis. Interim bono esse animo Bil-  
sium jubebis, autorq; sis ut se quoq; ab in-  
teritu balsamo modestiae vindicet, nisi illis  
annumerari malit quos facetus ille morum  
castigator *Lucianus* in Necyomantia mortuos  
juvenes, sed integros in inferno vidit, maxi-  
me *Aegyptius*, propter illam condiendi effi-  
caciam. Nec altera illius sectio sine cruore,  
hujusq; de loco in locum propulsio, Te tan-  
topere turbet. Quid quid enim huic artificio  
subest, vinculis debetur & circulationi, quod  
nuper meus *Stephanus* clarius demonstravit.  
Et quanquam mysterium subesset, judicat  
tamen Doctissimus *D. Barbettius*, inutile  
esse tale secretum, quod oeconomiam corpo-  
ris humani turbat potius, quam illustrat,  
omnia enim vasis sanguineis teneriora dis-  
rumpi, atqui illa satis clarè nobis esse de-  
picta, ut novi quid inde melioris frustra ex-  
pectetur. An igitur veritas alia Tibi placuit  
ut illa castra sequereris? Id equidem credo.  
sed quomodo pro illius veritate pugnare po-  
tuiti, quam ipse *Bilsius* secretam sibi servat,  
nulliq; mortalium revelat ante numeratam  
ingentem signati argenti summam. De ig-  
notis ne judicandum, aut affirmanti *Bilsio*  
statim credendum, ante visa experimenta?

Quantum intelligo, nunquam Tu, Vir perspicax, ad illius sacra admissus es hactenus, nec ullus alius peritior, qui de promissorum veritate testari posset. Si nudam apertamq; Naturam nobis sine velo obscuro exhibuisset, artesq; suas apertius orbi erudito prodidisset, & probasset, sine hæsitacione ambabus ulnis amplexus tecum fuisset Bilisiana promissa, & Hepati denuo essem gratulatus de purpurâ recuperata; sed tamdiu dubitavi, donec manifestius cuncta paterent. Enimverò quæcunq; ille pro Hepate restituendo, & Tu pro utroq; defendendo molitus es, conjecturæ meræ sunt, ansamq; dubitandi post se relinquunt, quum alia subesse possit ratio, quam à vobis fingitur. Quam diu enim oculis non patet, chylum per venas mesaraicas hepar intrare, tam diu negamus Hepar sanguinis conficiendi princeps esse organum, & quam diu chylo candido non turgent eadem vasa ut sine ulla dubietate chylus verus proximè ex intestinis adveniens dicatur, tamdiu pernegamus chylo ad hepar vehendo vasa illa esse destinata. Fidimus hic & ubiq; oculis, non conjecturis, nec dubijs colorum miscelis. Clara verò veritas pro Corde pugnat, in quod per thoracicum Lacteum visus fuit chylus  
lact-

lacteus defluere ex prima Cl. *Pecqueti* observatione, quam presso vestigio sequuti sumus. Quis tam Argus unquam fuit, qui in Hepate delatum candicantem chyli liquorem viderit? Vos verò qui sanguini chylum miscetis postquam intestinis excidit, confunditis distinctos liquores, & distincta Naturæ vasa, ut rectum firmumq; de mistorum liquorum cursu iudicium ferre nemo sine præ iudicio valeat. Clara & perspicua esse debent, quibus novæ hypotheses innituntur, ne tandem ad confusum chaos redigatur Ars illa, quæ, quia sensu manifesto & distincto nititur, pro certissima habetur. In eam curare utriusq; industria incumbat, ut ex manifestis veritas eruatur, nec ullo fascino oculos nostros effascinari nobis patiamur.

Hac spe animatus cursorio oculo & amico, eruditissimam tuam *De Hepatis Officio* Dissertationem, nomini meo amicè inscriptam, pervolvi, sed unum ibidem in Te desideravi. Ignosce quæso, mi *Deusingi*, quod libere tecum agam & nascentis amicitiae experiar fructum. Nimia facilitate peccasti & ignotorum experimentorum applausu. Facilis fuisti ad illa amplectenda quæ verbis tam speciosis orbi Nobilis *Bilsius* promisit ut vel



lactis gallinacei sperare inde possis hauſtum, quāquam nunquam ex experimentis illius quidquam ipſe videris, ſolo auditu contentus, immemor veriſſimæ *Luciani* laudati ſententiæ *Quom. Conſcr. Hiſt*: ὥτα οφθαλμῶν ἀπὸ ὅτι αἰσώτερα: aures quam oculi minus fide dignæ. In hac credulitate diſſentit à Te, Viro alioquin extra vulgaris diſſidij aleam poſito, animus meus incredulus, qui oculos manibus junxit. Non nego hominibus eruditis & in Arte exercitatis eſſe habendam fidem, ijsq; qui illuſtria ſuæ fidei & ſinceritatis orbi erudito ſpecimina dederunt, ut ijs ſecurè credi poſſit; at illi applaudere, proq; illò acriter pugnare, tanquam pro aris & focis, qui & literarum & eruditionis eſt ignarus, nec ab erudito orbe in numerum authorum fide dignorum adſcitus eſt; nescio an ſine exiſtimationis fiat detrimento. Scientiâ tuâ præclarâ, qua hætenus magno tuo merito inclaruiſti, abuſus es in eo defendendo, qui noſtris ſacris nunquam initiatus eſt, tuaq; facilitas tantum à Te impetravit, ut inimicum ordinis profeſſorij, cujus ipſe haud poſtrema pars es, & rudem literarum humanorum, artisq; Medicæ oſorem publico Comentario & laudaveris, & propugnaveris. Fruſtra

stra Tibi *Hippocratis* nostri Iusiurandum in memoriam revoco, quippe ipse magno Auditorum commodo, Academix splendore & propria laude, medicinam doces & exerces. Patere tamen pro humanitate tua, ut neglecti iurisiurandi Tibi exprobrem audaciam. Præceptionum enim & auditionum totiusq; tuæ disciplinæ participem illum fecisti, qui tantum abest Medico juramento nomen fidemq; dederit, ut & Medicos omnes veluti fungos præ se alto supercilio spernat, & contra *Hippocratis* nostri juramentum mercede & syngrapha artes suas edoceat. In malam partem noli interpretari libertatem meam, quod sine fuce Tibi aperiam, quid displiceat. Non negabis mihi tuam facilitatem, quam in credendis Bilsianorum secretis prodiga manu profundis, certo enim credas plurimum apud me publicum tuum juvandi studium aliaq; merita valere. Quid autem ab illo gratiæ referes, tempus aperiet & subolfeci modo, sed reticeo, ne inter vos seram inimicitias, parum profuturas. Sed nolo illa tædiose Tibi exprobrare, quæ pro veritate, seposito supercilio, in Te suscepisti, speciosis experimentorum novorum titulis inescatus, optandus Tibi potius rei speratæ optatus successus

cessus. Ipsa quod spectat Bilſianæ factionis experimenta, quibus in integrum reſtituere Hepar exauctoratū Bilſius non ita pridem magno conatu attentavit, ne verbum amplius addere ſtetit ſententia. Nuntium enim illi remiſi, & Res ſibi ſuas habere juſſi, ſicut ex Epistoſta mea ad *Stephanum* meum perſpexiſti. Malam enim gratiam inii, quod ſine dubitatione in dicta illius non conſenſerim, & diras nullo meo merito impetravi, ut ab iſto ulcere manum in poſterum ſim retracturus. Tuam verò in gratiam omnia volo, tecum ſermones miſcere vacat, propter veritatem de veritate inquirere, & cum ſapientibus apud ſapientem dubitare. Omni officio devinctos nos haberes, ſi funeratum Hepar exbuſto revocare poſſes, aut excuſſo ſomno ad priſtinam vigilantiam reduceres, ſi quidem alto ſopore tantum, ex tua opinione, immerſum actiones conſuetas ſuſpenderit ad tempus, non neglexiſt. Fuit, fateor, annus qui hunc præceſſit, Regibus amicus, quo imperium ſuum juſtè recuperarunt, qui injuſtè amiſerant: an eadem Hepati tumulto vel in exilium acto fortuna adſpiraverit, juſtis de cauſis dubito, quum necdum ſociorum ſuorum foederi renunciaverit Cor, in ſubſidium hæc-

nus

nus paratorum, & ad omnem peregrinum in-  
 sultum civilesq; motus intentorum. Ut mun-  
 dus, ita nec corpus humanum regi potest  
 duobus dominis. Regna & thorus non pa-  
 tiuntur socium. Nec sine pugna cruenta è  
 folio avito detrudi se Cor amplius patietur,  
 suo exemplo edoctum, tam difficile esse im-  
 perium recuperare, quam facile illud amit-  
 tere. Non igitur se solabitur Hepar aliorum  
 fortunâ, quam sibi quisq; suam vel habet vel  
 meretur. Non omnibus contingit adire Co-  
 rinthum. Quantum cuiq; restat, prima  
 nascentium hora disposuit, si *Senecæ* credi-  
 mus *L. cur Bon. Vir. Mal. accidunt*; unde  
 magna varietate singulorum vita distinguitur.  
 Si saperet Hepar, sana nostra consilia seque-  
 retur, & diutius placidum somnum extende-  
 ret, nec regnum, quod justè amisit, injustè  
 invaderet, secus enim si res ceciderit, faba  
 cudetur in seditionis novæ & factionis au-  
 thores, sicq; consilium malum consultori  
 erit pessimum. An copiarum tuarum pares esse pos-  
 sint, quæ vim & impetum Cordis ejusq; ex-  
 ercitus sustineant, prius justa diligentia ex-  
 pende. Agmen Bilsianorum argumentorum  
 fame pressum, commeatu intercepto evanuit,  
 quanquam primos impetus vehementes ha-  
 bue-

buerit. Imperatoris quoq; nostri fortitudine & hi & illi & isti profligati & arenâ pulsi. Dispersas copias Tu pro *Bilſio* ejusq; Hepate avaro colligis, qvo ſucceſſu videamus. Dubito de felici, quia auguria terrent & infaſta exiſpicia, hepar enim ipſum profundo ſomno vel mora tot annorum in tumulto, ex parte putredine infectum, ἀλεβον eſt, amiſſiq; fibras. Sed augurijs omiſſis, quia cœlum aruſpicum forſan mecum non curas, rem controverſam aggrediar, Tibi ut morem geram, viſurus an experimenta veſtra, à me impugnata, tantum robur apud Te receperint, ut perſuadere planè queant, ad Hepar chylum vel chyli partem deduci.

Dubium ex Exercitatione Tua poliſſima De *Chyli Motu* text 50. depromptum præmittis, quod ipſe primus moveram olim in Hiſt. De *Lact. Thorac. C. XV.* quum Hepatis in gratiam omnia tentarem, quodq; ex inde ab aliis fuit arreptum, ut Hepati ferrent ſuppetias, meque meo ipſius gladio jugularent: nempe, quia unicus plerumq; & anguſtior eſt Lacteus Thoracicus, lacteæ verò venæ meſaraicæ copioſiores, chylusq; abundantior, videri nullam eſſe proportionem inter vaſa adducentia & abducentia. Quid

Rio.

*Riolano, Baccio*, aliisq; alibi responderim; adeoq; ipsi mihi, in præfenti non repetam, ne in nimiam molem, cum lacteis, mea exerescat Dissertatio. In *Spicilegij Secundi* Cap. 1. Pecqueti Sententiam produxi, non ut meam, sed ut tanti tamq; felicitis Professoris iudicium de hac controversia lectoribus aperirem. Nititur autem illud demonstratione subtilissimi *Renati des Cartes* l. 2. Phil. Princip. c. 33. qua probatur celeritate angustiam compensari. Hinc *Pecquetus* celeriori profluvio chylum in lacteas thoracicas ex Receptaculo suo incitari putat, propter vicinorum viscerum compressionem, vicinæ aortæ continuum pulsum, & muscolum psoas. Tibi, Vir multiscie, displicent hæc exercitati Anatomici argumenta, nec credis causam aliquam excogitari posse, quæ celeritatem motus per ductum Thoracicum in tantum adaugeat, ut multitudo lactearum per mesenterium sparsarum ac innumerabilium capacitas, eâ celeritate compensetur. Ego causis allatis quæ celeritatem motus in lacteo thoracico promoveant, unam adjungo, ex tuis ipsius principiis, validam nempe cordis attractionem. Mira res, illum defendi ex principiis ipsi contrariis, Te ex propriis impug-

nari

nari. Negat ille attractionem, Tu defendis, passimq; in lectis Exercitationibus tu-eris. Non me inter tantos artis nostræ Magistros arbitram constituam, quos amo ab humanitatem & veneror ob artis peritiam. Ultramq; ego alibi actionem conjunxi, nescio an bona eruditorum venia. Tu judices, quia hoc agere decrevisti. De Clitumno fluvio *Plinius* l. 8, Epist. ad Romanum, testatur non loci devexitate, sed ipsa sui copia & quasi pondere impelli. Chylus verò quia & ista devexitate loci caret & sursum tendit, necessario & pellentis & trahentis auxilio indigere videtur, cui à copia pondus accedit ingens. Quod si Cor antliæ in morem pro calore sibi innato & adveniente valide toties repetitis momento systoles & diastoles motibus trahit liquores, sanguinem scilicet chylumq; in axillaribus mixtum, sicut calida omnia ad se vi quasi attrahunt, ut sol vapores, inflammatae partès sanguinem, succinum calidum paleas, & caput cum incaluerit tenuissimum per arterias ad se ex corpore; certè magnum momentum erit procellerrimo chyli per ductum thoracicum motu, quo compensetur vasis exilitas pro multitudine lacteorum in mesenterio, ut sicut fabri lignarij  
dum

dum ferra secant, hic quidem trudit, alter vero trahit, ut idem uterq; efficiat, monente *Hippocrate* l. 1. De Viâ. Rat: ita & tractione Cor, & pulsione inferiora viscera cum celeritate chylum promoveant. Reverà motum esse celerem, inde apparet, quod cito dispareant vasa & ductus, candidusq; liquor cito in lymphaticum immutetur. Disparentiæ quidem aliam divinaſti cauſam, nempe, quod venæ meſeraicæ ex glandulis & meſenterio continuè hirudinum inſtat ſuccum chyloſum eliciant & ad truncum portæ tranſmittant; ſed eam nullo argumento vel in ſpeciem probabili, ne dicam ſenſu ullo probas, nam quod de venarum ex omnibus partibus ſuctione tradis, effugium eſt, quo cuncta quæ non aſſequimur, excuſare poſſumus. Quid quid venæ attrahunt, ex partibus trahunt cruorem unde emergunt, deferuntq; illuc quo ſanguis alias patentibus vijs fertur. In morboſis *μεταδόσις*, omnes morborum hac viâ fieri poſſunt: Condonandum enim *Hippocratis* ævo, quod carnes cum perſuſæ tumidiores & rariores extiterint, ex venis ſanguinem trahere dicantur Lib. 2. de Morb. Nec facile perſuaſeris plurimas venas lacteas ad inteſtina terminatas, propagines eſſe venarum





narum mesaraicarum, quod à nullo, quod sciam, observatum fuit, ideoq; nec magno *Riolano*, idem suspicanti, in *Defensione* nostra concessimus. Per Cor verò, quia inter se patent, connectuntur, naturalisq; humorum est commeatus, à lacteo thoracico per axillarem venam valida attractio concedi potest, quam reliquis vicinarum partium compressionibus junge in *Pecqueti* defensionem, & multum junctæ proficient, licet singularum pulsio exilis Tibi videatur, si per partes progrediaris. Dum enim in mesentericis venis lacteis motu musculorum, diaphragmatis & c. chylus pellitur, eadem quoq; opera celerior motus promovetur ex Receptaculo in lacteas thoracicas. Non impedit arteria aorta, sed sua compressione juvat, quia celerius per vasa sua effunduntur liqvores, quod in ipsis artiarum cordis compressionibus seu systole liquet, præsertim quando compressio remissionem subitanæ habet. Musculi psoas motus licet exilis sit, fortis tamen censetur, propter carnosæ substantiæ firmitudinem & robur compactum longiusq; protensum. Cætera mitto, quæ de venarum lactearum exilitate & tarda glandularum suctione mones, alibi enim hoc saxum volvi, nec meas  
hic

hic partes ago. De proportionē verò venarum lactearum innumerabilium ad unicum lacteum thoracicum, licet & id dubium alibi enodarim, unicum hic verbum addam, ut videas quam prompta mihi sit manus in tuū obsequium. Principio, opus non est, ut viæ subsequentes ac intermediæ primis sint proportionatæ, seu pares, ubi humorum in intermedijs subsequentibusq; vijs nulla mansio esse debet, sed successiva expulsio, ita enim quanquam lacteus thoracicus unicâ mensurâ non caperet tantum, quantum mittitur, successive tamen partem post partem reciperet, reliquo in primis vijs tamdiu hærente. Si proportionem veram accuratamq; desideras, ex *Galenī* more l. de Disssect. Ven. c. 1. perenda illa erit inter venas lacteas Receptaculumq;, & inter Cor ejusq; annexa vasa. Cor enim est recipiens, ductus thoracicus est tantum via intermedia, cujus paritatem cum mittente vel recipiente nullo jure postulas. Ita nec inter ureteres vel ipsos renes cum cavitatē vesicæ, æqua est magnitudo, nec esse debuit, quia illæ sunt viæ tantum per quas labitur successive falsus humor, hæc alveus est in quo lotium stagnat & ad tempus excretionis retinetur. Quia igitur alimentarij corporis

B 2

humor

humores in perpetuo versantur motu, non opus est exacta comparatione paritatis inter vias primas & subsequentes, multò minus inter intermedias, quæ inter recipientes, & mittentes, ut canales intercedunt. In vegetabilium genere sæpe truncus arboris crassior & ad ramorum multiplicem luxum accommodus videtur, nonnunquam tamen angustior, qui nec radicibus amplis respondeat nec ramis, foliis, fructibusve copiosis, imò, si vera loqui volumus, viæ intermediæ in arboribus perpetuo sunt angustiores, si ad extrema conferantur, quia per corticem nutriuntur. In hordei unius spica sæpe 80 grana numeravi, culmo satis exili. Mira est terræ in Insulis nostris Ferroensibus saxosis fertilitas, ubi plerumq; ex unico hordei grano quinquaginta culmi, totidem spicis excresecunt, granis fecundissimi & turgidi, cujus generis culmos in rei fidem apud me servo illinc allatos. In Gerar centuplum ex semente accepisse Isaac Patriarcha fertur *Genes. XXVI, 12.* Ex tumoribus anomalis aliisq; excrecentijs carneis tuam quoq; proportionem urgebo. Tenui plerumq; funiculo exortus illorum constat, in magna tamen mole anomali corporis non tantum copiosa vasa sanguinea

vineæ, quibus crescunt & augentur, sed & vasta satis & tumida conspiciuntur. Exempla passim occurrunt, quæ, nè actum agam, nolo transcribere. Dum hæc ad Te meditor, puella ad me venit precium laborum in demoliendo vallo suburbano repetens. Recedentis tergum cum uxore mea suavissima forte adipiciens, vel gibbosam illam putavi, vel onus aliquod gestare. Revocamus puellam, ut certiores de affectione ista reddamur. Tumorem illa haud invita nobis detegit, & inspiciendum præbet. A medio dorso carnosus tumor dependebat angusto principio, cujus basin manu commodè amplectebar, protendebaturq; vasta mole æqualis, ad tactum mollis, mammarum instar, sed quem vix utraq; manu expansa attollereres, supra nates, quibus incumbit, turgidis venis hinc inde copiose variegatus. Dic mihi, qui tanto ingenio polles & Mathematicarum quoq; rerum peritia excellis, quæ nam proportio inter vastas has venas copiose in tumore carneo conspicuas, & inter exiles illas angustasq; in exortu e corpore enatas. Similia sæpe occurrunt, monstrantq; quomodo vaporum distributio limitetur à Natura, in ipsa necessitate quoq; artificiosa, & æquantur

vans proportionem, licet eandem pro iniqua subinde habeamus. Propius lacteas thoracicas inspiciamus, illarumq; ad lacteas mesentericas proportionem, seu paritatem, non usq; adeo necessariam, quia, si accurato esse licet, tantum rami cujusdam rationem illæ habent. Certe non adeo exilis angustusve est ductus thoracicus, quin cum socijs lacteis in mesenterio possit conferri. Nam quanquam videatur exilis, amplior tamen est quando copiâ chyli adveniente & hæsitante dilatatur aut intumescit. Preterea qui simplex plerumq; est, nonnunquam socium indipiscitur, quoq; cl. *Pecquetus* semper notat, ego tamen in perpaucis inveni. Suspicio duplicem a Natura tum esse conditum, quando pro copia chyli vel numero lactearum mesaraicarum in gulosis, unicus non est capax, qui sufficiat naturæ indigentæ, & comæatui transportando. Auget capacitatem canalıs longitudo, quæ tanta est quanta universa dorsi regio & lumbaris pars, quum lacteæ mesentericæ, numero licet plures, angustæ sint & breves. Expende jam mecum, si vacat, successivum chyli progressum, qui cum impetu non fit, nec uno ictu universus per canalem ad cor effunditur, sed pedetentim & quasi per

per mensuram æquam successivè: qui enim chylus statim per tubulum transire nequit, post exiguam in Receptaculo, vel lacteis mesentericis moram, ordine suo percommode succedet. Nec moræ damnum patitur. In lacteis enim venis perficitur, ne vel pimum crudus axillaribus infundatur, vel ad sanguinem ineptus sit. Hinc si illa jungamus, quæ vel ex propria vel *Pecqueti* conjectura alibi signavimus, liquido constabit, eam esse proportionem ductus hujus lactei ad vasa mesaraica lactea, qua in transfundendo universo chylo per partes ad Cor indiguit Natura, ut ad Hepar chyli particulam transmittere, necesse non sit. Ut planè acquiescas, mechanicè hæc evidentissimè demonstrabo. Canalis angusti, quo enemata injiciuntur, ad amplam vesicæ bovinæ capacitatem nulla videtur proportio, si semel confertim ejiciendum esset decoctum, at successiva propulsione & compressione eliditur omne quod in vesica continebatur. Finge loco vesiculæ unius capaxis, centum cellulas exiles seu loculos, qui desinant in unicum canalem angustum. Hæc unius canalis ad centum proportio sufficiens est artificis instituto. Nam si simul comprimantur exiles loculi, simul

effluit per canalem ex liquore quantum potest, reliquisq; compressionibus successivè reliquum evacuabitur. Siphone angusto vini cadus educitur. Rupto aggere ad latitudinem pedum aliquot, stagnum evacuabitur mille passuum, si eadem conditiones serventur, quas in chyli distributione & Natura probavit & nos sequuti sumus. Parva esse debet syringa in paracenthesi, ne confertim serum in Hydrope emittatur, vel fistula in Empyemate, quæ post decimum demum diem, ex Cui præcepto, pus universum ex thorace exstillet. *Vegetius* l. 1. *Malomed.* c. 43. & l. 3. c. 25. fistulæ meminit Centimalis. Quæ verò hæc? Dubitant omnes, qui *Vegetium* legunt. Nec injuria, quum nec sibi in hac lectione consentiat ipse *Vegetius*, vel illius scribæ. Codex enim *Sambuci* legit Centinalis, *Florentinus* Centitalis, *Anonymus* in codice *Hædriani Junij* Centralis. Alius apud *Rhodium*, Polyhistorum nostrum, gentialis, qui exinde in Notis suis ad *Vegetium*, propædiem per nos edendis, suspicatur esse legendum geniculata, h. e. nodis interstincta. Ego à consilijs *Malomedico* non fui quum illa scriberet, voluit tamen talem fistulam vocatam vel centinaulam quod centum formini-

minibus totidem naulos aquam evacuando  
 persolveret, vel lentemalacam, quod & mol-  
 lis esset & lentè illius opera abdomen emol-  
 liretur. Talem verò fistulam Mulomedici,  
*Vegetio* narrante, l. i. c. 43. portare consue-  
 verunt, minutis foraminibus multisq; pertu-  
 sam, per quam foras humor emanabat, qua  
 forma quoq; à *Sculteto* in *Armam. chir.* de-  
 pingitur, sed obtusa, neutiquam ad similitu-  
 dinem calami scriptorij exacta, sicut tradit  
*Paulus Aegineta* l. 6. c. 50. quem ideo rectè re-  
 jicit *Aquapendens* in *Oper. Chir.* Foramina  
 verò minuta erant, ut tantum humoris curre-  
 ret quantum æstimabatur necessarium, pro-  
 cuiusq; virium ratione, nec confertim cum  
 ægri noxa efflueret. Ideo minuta erant *Ve-*  
*getij* foramina & ipse canalis καλομίσχος,  
 canaliculus dicitur *Paulo* l. d. Unde ipse pro-  
 portionem metire inter amplissimi abdomi-  
 nis ampullas, & canaliculi foraminula, per  
 quæ universa aquarum colluvies evacuari po-  
 test, ut par iudicium de nostra controversia  
 fiat. Plura in re manifesta non addo, nisi  
 hoc solum, quod angustum canalem thora-  
 cici ductus data industria efformarit Natura,  
 ut commodior expeditiorq; fieret à corde at-  
 tractio. Quemadmodum enim *Hippocrates*



ait I. de Prisc. Med. si ore hiantes fueris, nullum humorem attraxeris, ubi verò protensis labris constrinxis & compresseris, prætereaq; fistulam admooveris, attrahes. Licet angustior fistula sit, sugendo tamen & attrahendo amphoram evacuabis, cujus alioquin ad siphonem vel os contractum, nulla videtur rerum ignaris proportio.

Missæ vero ista proportionem, cujus modo accuratam dedi rationem, ex sectione vivi animalis aliquid pro chyli ad Hepar translatione moliris. Si enim in sectione vivi animalis mox, quanto ocyus id fieri potest, intercipiatur vinculo ductus thoracicus, haud tamen motus ipse lactei liquoris, qui per venas lacteas in mesenterio contingit, inhiberi deprehenditur quin nihilominus hæc sensim dispereant & evanescant. Plus apud me auctoritas eruditi Viri valet, quam ut in dubium velim vocare tuam experientiam. Ego tamen nihil tale observavi. Nec facile id persuaseris scrupulosis & accuratis rerum anatomicarum indagatoribus, nisi finitâ pene chyli distributione aperiatur animal, tum quidem inaniuntur lacteæ, & in chyli motu disparent, sed non eam ab causam, quam pro Bilio putas. Neq; enim necesse est, ut lacte-

lacteus liquor ad hepar progrediatur in ductus thoracici ligatura, quia aliae partes adsunt ad servitium promptae, quo amandatur, Némpe ipsum Receptaculum chyli Pecquetianum, quó tanquam in alveum defluit chylus ex lacteis mesentericis. Illuc autem confluere liquorem omnem candidum, qui inanitas venas lacteas linquit, id indicium habemus, quod in hujusmodi ligatura thoracici ductus, distendantur & Receptaculum & ipse ductus thoracicus, & præter solitum tumeant, quanquam si diutius chylo repleantur, dilutior evadat color. Quod interea chylus ille non ingrediatur Hepar, discere in proclivi erit, si eodem tempore venæ portæ trunco prope hepar ligato, nihilominus motus lactei liquoris perftet & lacteæ mesentericæ inaniantur, nisi enim tum omnis chylus ad Receptaculum & thoracicum pergeret, non disparerent utiq; mesentericæ lacteæ. Per mesaraicas rubras imbibi, solâ conjecturâ assequimini, nullâ demonstratione apodicticâ vel oculari experimento. Inter conjecturas primarias, cui universæ difficultatis pondus incumbit, hæc Bilsij una est, quod arteriæ in mesenterio canis ligatæ post aliquot horas vacuæ deprehendantur infra ligaturam

turam, venæ verò succo subobscuro, cinericoq; repletæ conspiciantur. Hunc succum pro chylo habet, eumq; ad hepar tendere indubie suspicatur. Cæterum monui in *Spicilegio Secundo* venas necessario repleri arterijs ligatis, at venas liquore chyloso ex intestinis impleri, non sequi necessario, quia aliunde hauserunt; quo turgent. Iam ulterius addo, non posse ex intestinis trahere, alioqui candicaret contentus in venis succus. Postquam enim per quatuor vel quinque horarum moram in consuto cane, ligatisq; mesenterij arterijs, sanguis omnis ex venis ad hepar protrusus fuit, quod brevi tempore fit, ab circulationis celeritatem, inter quam & inter chyli motum ipse distinguis, necessario venæ vel inanes invenirentur, siquidem arteriæ omnes accuratè fuerunt conspiciatæ, vel succo candicante implerentur, si quidquam ex intestinis proveniret, etiam lentissimo gradu. Hinc verò quia candidus ibi liquor non comparet, sed ex observatione Biliaria subobscurus, sequitur primò chylum purum non esse, vel prorsus chylum non esse, quia purus esse deberet postquam omnis sanguis ad hepar est propulsus; deinde apparet arterias tam accuratè interceptas.

ceptas non esse omnes, quin aliquid cruoris transmittant, quo liquor aliás candidus tingitur & suboblucrus, euadit. Revera arterias non ita intercipi exacte quin aliquid permeet, vestra festinatio prodit. . Celerrimâ enim manu suas operationes Bilsius peragit, ut visum spectatorum fugiant, unde vel oculi deluduntur, vel fallax fit ligatura. Celeritatem quidem Chirurgorum in fasciis ligandis commendat *Galenus* l. de Falc. in præf. ad evitandum dolorem & elegantiam conciliandam. In vivorum sectione major celeritatis ratio habenda, unde *Columbus* l. XIV. de Viv. sect. mira celeritate jubet acu contorta filo immisso quatuor cordis vasa arcte colligare & cor abscindere, ut eanem sine corde ambulantem ostendat. Fit tamen ab imperitoribus, ut festinans canis coecos pariat catulos, & Bilsiij festinatæ sectioni competat, quod *Zeuxis* pictor tardus celeri *Agatarcho* olim dixit: Tu tempori, ego pingo æternitati. Tempore pecuniæ corradendæ hac celeritate persuasit Bilsius accuratè arterias esse ligatas, cum revera vel hient & laxius sint constrictæ, vel non omnes intercipientur, adeoq; solum fumum monstravit spectatoribus, & nebulas pinxit in pariete. Et quanquam

quam arcto vinculo prius celeri manu constringantur arteriæ, sibi deinde relictæ, motu violento de facili tamen relaxantur.

Ut verò probabilitatem hisce experimentis pro saluando Hepate concilies, alia via erit aggredienda. Nempe jejuno ventriculo canis aperiatur, ligenturq; arctissime meditata manu & promptâ arteriæ, tum si venas inanitas semper inveneris, aliquid forte obtinebis. Adhuc eodem tempore alius canis pascus disseccetur, ut appareat, an in hoc vester liquor subobscurus & cinericeus succedat. Artis peritis idem tentatum, sed spe sua frustrati, talem cinerem velut ad Ætæ fornacem, non invenerunt. Credamus verò vera vos observasse, primo meam in gratiam circa hepar Portam ligate, ut videatis sine paropijs, quam contra vos militent inflata prope hepar vasa Lymphatica, & manifestè appareat, lymphæ cursum prorsus esse alium, quam sibi persuasit ille qui celeri manu celerime & naturam torquet & nos decipit. Deinde in experimento tali, ligandus quoq; cum arterijs est ramus splenicus, ne quidquam ad truncum portæ vel vicinos ramos affluat aut percoletur, quod liquorem vestrum turbet. Nihil horum factum deprehendi, ut  
sus-

suspicio sit subobscurum vestrum liquorem, non esse chylum, sed ex miscelâ variâ varij in mesenterio sanguinis infectum cruorem.

Quod de splenico ramo dixi, ne miteris. Quamquam enim ex liene ad venas mesaraicas nihil adveniat, quo ordinario cursu inquinentur, tamen in communi trunco cum refluxo sanguine succoq; acido imprægnato concurrunt liquores ex venis mesaraicis, quæ an nimio pellentium trahentiumq; partium conatu, in longa illa consuti animalis concussione & valvularum in mesentericis laxitate & paucitate, præter consuetam naturæ legem turbentur & confundantur, majori forsân veri similitudine opinabimur, quam vos, qui venas mesaraicas ex intestinis ad sensum impervijs sugere chylum suspicamini. Impervia illic via est secundum naturam, nec osculis in intestinorum cavitatem hiant vasa sanguinea. Fluxus enim sanguineus est præternaturam, erosus acri humore venis & intestinorum tunicis, nec inde argumentum sumi potest sufficiens, ad naturalem suctionem & osculorum apertionem. Bilsiana cadavera balsamo condita quæ venas mesaraicas in intimam intestinorum tunicam irradiatas oculis, ut refert,

tac-

tactuiq; exhibent, naturali partium constitutioni adversantur, exsucca enim sunt, aridaq; & illas partes patulas ostendunt, quæ in sano statu clauduntur. Revera quoq; fallacia illi *Bilsianæ* demonstrationi subest. Vidit illam *D. Moinichenius* noster, in arte secandi peritissimus, quum ex Italia redux, *Roterodamum* pertransiret, sed admirari non potuit. Etenim in illis quæ ipsi monstrabantur patulis osculis, intestina erant abscissa, ut mirum non sit vasa mesaraica ab intestinis detruncata & resecta, orificia patentia ostendere. At an ita in viventibus & integro corpore appareant, non vidit, nec fieri potest. Quod si oscula vasorum intestinalis adherentium patentia monstraverit *Bilsius* idq; per naturam, magnus nobis erit *Apollo*. Per poros verò ferri chylum & transudare, commune est effugium, quo divertunt quicunq; vel ex ingenio confluxum humiditatum fingunt, vel veras causas ad oculum demonstrare non possunt. Eò si sit confugiendum, expeditior breviorq; via ad hepar per ventriculi ipsius poros sterneretur, nec tot per patulos intestinorum vasorumq; meatus ambagibus esset opus. Imò ex his principiis facile eludemus vestras arteriarum mesaraicarum

carum ligaturas. Per poros enim transfundabit cruor, & venæ mesaraicæ aliunde exsugere possent per hos poros cinericeum liquorem, quem tantopere extollitis. Nos vero libentius apertas & à Natura intento digito monstratas vias eligimus, plus oculis fidentes quam conjecturis aut dubijs rationibus, quæ ad omnem subinde partem suspensos animos flectunt. Illa *ἐνέχουσα* Hippocratica multorum paradoxorum in Arte nostra mater fuit. Si eo compellerer angustiarum, libentius tecum sentirem, ex mesenterio chylosum succum suscipi per venas lacteas eo delatum, sed tantum in casu necessitatis, quum probe ligatis arterijs nihil ad venas mesaraicas devenit; unde quum continuus sit motus, dilatenturq; fortè illo motu & violento pori venarum, forsàn aliquid ex mesenterio attrahitur præter naturam, si quidem pro chylo habendus est ille liquor quem cinericeum vocatis. Præternaturam dixi, ne perpetuam legem conficias. Tam benigna enim est Natura, ut non hoc tantum, sed quod *Aristoteles* in *Præf. Quæst. Mech.* deprædicat, in multis sibi ipsi, quod nobis usui esse potest, contrarium faciat. Atq; ita ingeniosæ tuæ conjecturæ prompti-



us assurgerem, quippe quem pro Doctissimo Viro ætumo, & eo dono excellere observavi, ut conjectaris sæpe veritati præludas, & præscio animo prævidens observationes adhuc latentes, ut facile existimare queamus prudentiam Tuam, quod de Attico & Ciceroneâ Nepote dictum memini, quodammodo esse divinationem; quod vidimus in lactis via ad mammas, in chyli ad uterum, & aliis curiosis divinationibus, quæ non falsum Te vatem produnt, & vero Hippocratis antiquorumq; genio animatum, quorum non pauci præfago quoq; animo nostrorum temporum inventa prædixerunt. Validiora esse divinorum virorum præfagia, quam aliorum, Plato scripsit. De ductibus salivalibus antiquis cognitis, ipse quoq; monuisti. Certè mirum est, quod adeò manifestè descripti illi ductus à Galeno, l. XI, de vf. part. c. 10. Hayabbate l. 3. Theor. c. 16. Abensina Can. 3. lib. sen. 6. tr. 1. c. 1. Jsaaco l. 3. Theor. c. 17. hætenus ad tempora usq; whartoni notitiæ Professorum se subdlexerint, quum tamen supra laudati Medicinæ Heroes vasa illa, tam perspicue & fusè descripserint, ut & originem & substantiam, & numerum, & usum annotarint. Meatus vocantur Galeno, haurito-

ritoria salivæ *Abensinæ*, habitacula salivæ *Halyabbati*, *Jsaaco* vero habitatio salivariis, quomodo tum Medicis appellata fuerunt. Distinguitq; *Abbas* hanc salivam ejusq; vasa ab oris alto, cui sufficit quod à superioribus ad ipsum à cerebro descendit. Unde superiorum vasorum salivalium gloria augetur, de quibus nuper repertis curiosè commentabitur civis noster & discipulus *Nicolaus Stenoni*, Anatomicis exercitijs addictissimus, quippe quorum nullam adhuc apud veteres memoriâ invenimus. Nostra vero Vasa Lymphatica nemini adhuc in mentem venerunt, nec ulli ex tripode prædixerunt. Ne tamen antiquitatis prærogativâ destituantur, quia magna inde inventis nostris veneratio affulget, *Hippocratem* Divinum aliquid divinasse suspicor l. 6. Epid. sect. 3. t. 4. ubi aquæductus nominat, ex quibus sudor guttatim effluit. *Οξέτος* *Hesychio*, & *Suida*, est canalis, fistula, aquæductus, rivus, & apud *Apollodorum* quidem *Megaræus* dicitur venisse *Εξ' Οξέτος* *Niso* opem laturus, quod *Ægius* Spoletinus vertit ex cloaca; sed emendat Vir profundæ eruditionis *M. Erasmus Vindingius* Regius Professor, &

Affinis noster, in Græcia sua, opere elimato,  
 Ἐξ ὀρχεστῆς h. e. ex Onchesto, sede imperij  
 Megarei, idq; ex *Pausania* eruditè illustrat,  
 quanquam & ὀρχεστῆς per vias urinæ & ster-  
 coris in corpore, accipiat alibi *Hippocrates* l.  
 de Art. Hoc loco doctissimus *Vallesius* cana-  
 les retinuit. Rectius *Herm. Crusenius* Campen-  
 sis Interpres Galeni in hos libros *Epidemi-*  
*on*, & post eum *Foësius* Aquæductus ver-  
 tunt, qui tamen postremus errat, quando in  
 Oeconomia Hippocratica hos aquæductus  
 per coeca cutis spiramenta & meatus expo-  
 nit. Quis enim tales aquæductus vidit, per quos  
 cribri instar aqua stillet. *Hesychio* verius  
 ὀρχεστῆς est αἰὲρ ῥέων semper fluens, ut lym-  
 phaticis nostris propius conveniat, & *Eroti-*  
*ano*, ἐκχύσεις τῶν ὑδάτων, ipsius *Homeri* te-  
 stimonio. Hinc *Hippocrates* l. de Artic. per  
 venas & arterias explicat, ut rectè *Galeno* no-  
 tatum, & post illum *Gorrao* in definitioni-  
 bus Medicis. Continuata enim sunt vala  
 nostra, continuè aquam profundentia, nec  
 interrupta. Unde nec Lymphaticorum no-  
 strorum splendorem satis es assequutus, mi  
*Deusingi*, quando in nervos tuis *Institutioni-*  
*bus Anat.* part. 7. c. 4. text. 12. originem illo-  
 rum

rum à pelliculis extremis repetis, ac membranis ambientibus, eò quod tenuis evaporatio in membranarum poros ac in habitu corporis fortè inter cutem & epidermidem se insinuans, exitum ulteriorem ex parte non inveniatur, quæ condensata ibidem propulsaq; quo datur defluxus, meatulos hosce efformat sibi in membranis passim per quas feruntur: quam sententiam antea brevius proposueras cap. 1. t. 10. sed ingeniosæ conjecturæ, quominus assentiar, ea faciunt quæ contra *Riolanum*, similia ferè fingentem, adduxi *Defens. Vasc. Lymph.* c. 8. Nam tam sui generis vasa dici merentur & ὀχετοί, quam vel lactea, vel sangvineæ, & à primo ortu cum aliis vasis datâ industriâ à Natura producta, neq; per accidens emergunt pro evaporationum vario arbitrio & incerto. Præterea continui sunt hi ductus, sua serie naturali eleganter conformati, quanquam una illorum non sit origo, quemadmodum clarissimè & nostræ & *Olai Rudbeckij* Anatomici Upsaliensis præstantissimi figuræ novissimæ ostendunt Per hos igitur ὀχετες sudor manat, & quidquid sudorem promóvet, quod de lymphaticis nos quoq; suspicati sumus in *Vasc. Lymph. Hom.* c. 4. t. 8. Quidquid sit, illum honorem *Hippocrati* dē-

fero, ut quasi per nebulam lymphatica vasa præviderit, quanquam nihil vel illius laudis decederet, vel nostris inventis, si illum multa ignorasse fateamur, quæ diligens manus nobis primis aperuit: nam

Multa dies, variusq; labor mutabilis ævi  
Rettulit in melius. --- ---

Sed ad institutum sermonem, his in transitu prælibatis, resumpto calamo, mirari subit Bilfianæ philosophiæ stupiditatem, à Naturæ prudentia, ut credo, alienam. Natura enim crassioribus excrementis & liquoribus ampliora & patentia viscera & vasa destinavit. Ille contra subtilem chylum, quem rorem vocat, per manifestos, copiosos, & amplos chyli ductus mesaraicos, & thoracicos semper derivat: at crassum alterum, spissioris consistentiæ & vitreæ materiæ, chylum ipsi proprie dictum, ex intestinorum porulis per venas mesaraicas rubras immediate percolari perpetua lege fingit edicitq;, nullis vijs manifestis, sed per solos poros subtiles. Præterea crasso huic chylo invidit vasa peculiaria sui generis, quæ subtiliori concedit, quam commodius fuisset subtilem rorem sanguini mesenterico misceri, illiusq; societate per vasis cavitatem decurrere, quam crassum

sum, cui tamen propria vasa erant necessaria. In officinis pharmaceuticis subtiles spiritus per vesicarum suillarum porules prompte exhalant, remanentibus interea in fundo crassioribus. Ipsa quoque elementa contra crassam illam philosophiam pugnant. Minoribus alveis dulces puræque aquæ decurrunt, falsæ & crassiores vasto oceano committuntur. At *Bilfus* tuus crassum suum succum chyli, per minimas vias repletaque alio liquore vasa distribuit, subtilem patentibus ductibus nulliusque alterius humiditatis consortio impeditis concredidit. Non multum illum juvas ingenioso tuo de flatibus responso, facile in auras evanituro. Manendum in eodem humorum genere, ut appareat numac subtilior liquor potius angustos meatus pervadat, quam crassior. Crêdo pugnaturum Te quoque pro subtili qui ingenio subtili polles. Cur flatus in magna intestinorum distensione in vasa subire non possit, sicut chylus, non est huius loci inquirere. *Helmontius* aliquid conjecturâ est assequutus. Neque enim flatus ita fugi ab intestinis possunt, sicut liquores. Singulari experimento probat *Vir* genere & ingenio æstimandus *Robertus Boyle* De Vi aeris Elastica Experimento quinto, aërea corpu-

scula per vesicam agninam non posse pertransire. Idem laudatus naturæ scrutator confirmat Exper. 36. alio experimento, si salis alicujus Alcalizati aliquantulum, aut calcem Tartari cum nitro præparato, in vesica arctè ligetur, atq; vesicæ fundus exterius in aquâ immergatur, illic enim si immersa aliquandiu teneatur, per poros vesicæ tantum aquæ transcolari, quantum ad salem in liquorem solvendum sufficiat. Una vero cum aqua penetrare quoq; æreū extra dubium est, ut hinc, quin subtilior aer cum chylo subinde quoq; mēstruicas pervadat, negare non ausim. Hinc enim flatulenta alimenta universo corpori molesta sunt, & per venas hinc inde flatus diffunduntur, ex assumptis cibis provenientes. *Hippocratis* doctrinæ hæc consentiunt, quem hic & ubiq; omnium bonorum nobis ducem, ut loquitur *Galenus*, l. de Præcogn. ad Posthumum c. i. libenter ad testimonium voco, quod sciam Te illius venerari auctoritatem. Ille venerandus Dictator L. de Flatibus docet cum omnibus his quæ eduntur aut bibuntur Spiritum aut copiosiorē aut pauciorē subire, illumq; etiam ad sanguine refertas corporis partes illabi easq; refrigerare ex febribus demonstrat & illarum  
sym

symptomatis; inprimis monet dolores capitis in febribus oriri ab aëre, quia sanguis vi pulsus per angustam viam transire celeriter nequit. Non igitur negata aërem transire per cerebri vel venarum membranas, sed negat celeriter transire, & certum est celerius subtilem transire quam crassum. Non diffiteor venas lacteas ad sensum in intestinorum cavitate naturaliter non hiare, sufficit enim crusta intestinorum carnea, qua velut panno sugunt & imbibunt chylum; sed per consuetum naturæ morem ad lacteas venas istum chylum pervenire, hisce oculis videmus, quia succo candido solo distributionis tempore implentur, eoq, chylo, quem vos non nisi ratiocinando in vasis sanguineis mesenterij invenistis, de quo semper dubitare cogimur, quia purus chylus non compareret, sed, ex vestra confessione, sanguis cinericeus & subnigricans, an non aliunde obscurior iste color vester, quam à chyli miscela, proveniat.

Certè chylum non esse, qui in venis meseraicis cinericeum seu subfuscum sangvinem efficit, si quidem efficit, ex accurata colorum naturâ videor persuaderi. Cinereus color is est, in quo albus color nigredine obfuscatur. Hic autem concurrunt colores

C, luc-



lucidi ambo, candidus & rubeus, ex quorum copula lucidus color emérgit, neutiquam nigricans vel vester cinericeus. Notat insignis *Galenus* comm. 1. in l. 6. *Hipp. Epid.* omnes colorum differentias ab hac voce rufsum significari apud *Colum.*, præter cinereum, quum si ex sanguinis rufi miscela cinereus color evaderet, aliter esset sentiendum. At contra naturam foret, si ex luce tenebræ ori rentur; vel ex splendidis coloribus subfuscus. Experientia quoq; vestram experientiam destruit. Misceantur invicem lac tepidum cum sanguine tepido ex vulnere effluente, splendidior sanguis emerget, neutiquam obscurior. Fac periculum, & falsas istas conjecturas damnabis, naturæ & veritati adversas. Quanquam verò in cinericeo colore candor insit, quum ipse cinis candicet, candidissimum in cinerem cornu Cervi redigatur apud *Scribonium* Comp. 122. & ipsa calx candidissima cineris quædam sit species; *Galenus* censet l. 8. *Simpl. Medic. Facult.* quanquam eidem colori nigror adsit, sicut revera adesse debet, quia cinericeus color ad *Θαύρον*, fuscum propius accedit, quem *Aristoteles* l. de Color. c. 2. ex nigro & albo derivat, neutiquam ex rubro & albo; ex his tamen difficul-

culter obtinebitis, ex chylo necessario sanguinem in venis meseraicis subobscurum cinericumve effici, quia coloris hujus varietate esse possunt causae aliae praeter naturam in corpore. Adduxi alias in *Spicilegio*, monuique fallere iudicium ex coloribus desumptum. Iam superaddo, ut ea quae de variatione humorum tempore consuti animalis dixeram, quoque illustrentur, primo admissio aëre externo, deinde in mora illa quinque horarum immutari colorem sanguinis & viscerum. Admissum enim aërem externum per apertum canis abdomen, deinde in consuto abdomine retentum, posse corrumpere & inficere sanguinis partiumque colorem nativum, juxta mecum fateberis, exindeque nonnunquam sanguinem conspici candidum, nonnunquam atrum. De aëre res nota, & pelvi exceptus sanguis post sectam venam docet. Eodem aëre intra corpus admissio turbantur interna, praesertim vinculo intus relicto, ut corpus universum commoveatur, & varij ad partem affectam & dolentem humores amendantur, vel statim motu illo violento generentur. De vulneratis *Hippocrates* inculcat lib. 1. de Morbis, si externa quidem parte sanescant, interna verò minimè, purulentos fieri. *Vulnus*

vestrum animalibus inflitum eandem aleam subit, quod per suturam quasi sanescit, de quo ulcere idem porró Cous ibidem pronunciat, dolorem vehementem & tussim & febrem afferre, ipsumq; ulcus, cum amplius calidum existat, sibi ipsi refrigerationem inducere, & á se caliditatem exhalare, pusq; expurgare. Mora deinde & calore accenso putredinali, facile ad nigrorem torretur sanguis, quod in febribus evenit. In hoc tormento, quod ex Bilsiana ligatura aliquot horarum experiuntur miserí canes, insignis calor excitari potest, cujus paroxysmus omnem febrilem insultum superare videtur. In Hectica venas miseraicas tumentes & sanguine atro turgentes, eoq; crasso & veluti concreto, qui è majoribus venis, coralli instar nigri invicem cohærens extrahebatur, observavit *Platerus* l. 2. Obs. Uxori quoq; I. de Bourdenier in venis varicosis sanguis est collectus fusæ pici similis, apud *Ballonium* lib. 2. Ephem. & cum dolores essent, detractus est magna copia sanguis atramento similis, quod etiam de Roberto Reuchenio Vesaliense juvene robusto & bilioso annotat *Io. Rhodius* noster Cent. 3. Obs. Med. 70. Hinc sicut calore interno sanguis, præsertim in

mesen-

mesenterio, non tantum nigricat, sed con-  
 crescit, quod vidit & idem *Ballonius* in D. du  
 Mesnil, & *Fernelius* l. 6. Physiol. c. 7. & lau-  
 dato loco *Platerus*: ita & extra corpus coa-  
 gulatur, ut exinde pro *Bilfis* non sequatur, esse  
 chylum, quia vel cinericeus est, subnigri-  
 cansve, vel coagulatur. Vides tutemet, unde  
 color varius adveniat, vides etiam, quia satis  
 es oculatus, quos ex diutina illa ligatura  
 manes sanguis in mesenterio patiatur. Mo-  
 ram tamen illam ideó necessariam inducis,  
 quia lenta est succi lactei ex intestinis perco-  
 latio: Sed concitator, me iudice, est perco-  
 latio in violento illo motu animalis sub tor-  
 tura retenti adeó ut vasa lactea & ductus  
 thoracicus manifesté citó impleantur. De-  
 inde quanquam tardior esset percolatio, tinge-  
 re tamen dilueretq; purpureum vasorum me-  
 laraicorum cruorem, vel per celerem raptum  
 ad hepar, expulso sanguine omni, solus chy-  
 lus relinqueretur in venis, & clarius ab om-  
 nibus videretur. Aliud igitur subesse debet,  
 cur post longas demum moras, cinericeus  
 subnigerq; evadat. Ad reliquias sanguinis  
 confugit *Bilfis* contra clarissimum *Barbetti-*  
*um*, quæ in illis venis pro majori vel minori  
 sui quantitate succum illum vel cinericeum  
 vel

vel magis fuscum efficiant. Si ea ad accuratum iudicii tui examen revocaveris, quæ supra hac de re disputavi, credo concessurum Te, vel reliquias nullas sanguinis tot violentis motibus sub longo cruciatu superesse posse, vel non ita accuratè arterias esse vinculo interceptas, quin aliquid exinde & vicinis partibus alieni liquoris possit pervadere & coloris quæcunque mutationem inducere. Ex reliquijs nonnullis rubri sanguinis, quomodo ad nigrorem infici possit copiosior liquor candicans, nemo assequitur, & Tinctores pro impossibili habent. Ad cochlearia quatuor vel quinque lactis tepidi, unum cochlear sanguinis recentis miscui, visurus quid eveniret. Color inde emerfit splendens, minio similimus, per aliquot dies constans, hinc separatis ex se liquoribus, subsidente lacte, supernatabat purpureus sanguis, quibus invicem iterum concussis & conquassatis, obscurior quidem mistura comparuit, sed puri tincto similior ob vicinam putredinem. Qualis verò tandem evaserit soli exposita & igni, post pauca dicturus sum. Reliquiæ igitur sanguinis quo parciores, eo candidior liquor cernitur, si candido chylo miscentur, nunquam cinericeus vel nigricans erit, nisi & oculi

oculi fallant & recta ratio. Si, quod promittit *Bilsius*, in cane robusto ritè præparato, semper cinericeus sit liquor, idq; quia, ut Tu explicas, sanguinis reliquæ e venis exprimantur, dic causam, unde cinericeus exsurgat color, rationem profer, cur non candidus sit ille liquor, reliquijs rubris expulsis, quem lactei coloris esse, nemo vestrum diffitetur. Tam autem certus sum, quam qui certissimus, nullum unquam tam accurato vinculo ligaturum arterias in ullo molosso, ut exinde lacteus liquor per naturæ consuetudinem attrahatur vel compareat in venis rubris mesenterij. Id si unquam præstiteritis, habebitis me vobis applaudentem, Hepatisq; partibus me sine morâ aut tergiversatione adjungam.

De cinericeo colore monendi præterea estis, frustra in subsidium á vobis advocari propter candorem, quem comitem habet, non enim á lactis seu chyli majori quantitate repetendus ille est, sicut vobis placet. Serum & pituitam immutare colorem sanguinis rubeum scripsi, & id quotidie in pelvi observamus. Non tamen ex intestinis, quod suspicaris. Vitio sanguinis ipsius in ipso sanguine generatur quoq; phlegma, & ex calore

lore colliquante vel resolvente serum, quod in ipso etiam sanguine antea delituit. Ab his nonnunquam in chronicis morbis & hypochondriacis, sanguis observatur in meseraicis vasis fæculentus, cinericeus, & glandularum excremento persimilis. Unde circa mesenterium & venam portam frequentius steatomata, scirrhi, & alij tumores oriuntur, quemadmodum præter alios notat *Hildanus* Cent. 1. Obs. Chir. 70. Cent. 2. Obs. 44. & passim alibi. Et lacti similia reddere alvus visa est in Apollonio cum insigni viscerum imi ventris offensione apud *Hippocratem* l. 3. Epid. s. 3. ægr. 13. qualia quoq; non ita pridem in splenetico Illustri post cruentas atq; dejectiones vidimus, ex quibus mesenterium apostemate corruptum vel putridum pancreas divinavimus. *Galenus* Comm. 1. in l. 6. Epid. ex sola pituita crassa & viscida colorem in urinis cinereum deducit. Menoni apud *Hippocratem* l. 7. Epid. urina ab initio cruda erat, cinerem colore referens, vel, sicut *Gorræus* interpretatur, ex cinereo colore albicans, qui color est crudi & diluti lotij. *Calvus* verò per cineres excolatam urinam intellexit & lixivio similem. si igitur ex sero & pituita sanguis mesentericus infici potest, cinericeiq; liquo-

liquores fieri, quodnam vos pro chylo vestro habebitis subsidium. Cinericeus color illis partibus aspergitur, quæ cum chylo nullum habent commercium nisi remotissimum. *Hippocrati* l. de Corp. Resect. pulmo cinericeum colorem nactus dicitur, non certe propter chylum, quem illuc ferri ille ignoravit. *Ruffus* l. 2. c. 5. ὑπόλευκον, subalbum reddit. Hujusq; candoris rationem *Galenus* de Util. Resp. ab aëre repetit & igne, unde pulmōi, sicut cineri, plurima insit raritas. Est enim, teste *Haly Abbate* l. 3. Theor. c. 20. compositus ex fragili carne aërea simillimus sanguis coagulatae spumæ. Hunc tamen colorem in ægro pulmone tantum non in sano admittit magnum Hippocraticæ scientiæ ornamentum *Io. Ant. van der Linden* Physiol. c. 6. t. 182. quanquam *Vesalius* l. 6. c. 7. fuscum viderit, non autem candente rubore rubeum colorem. Ex pulmonis abscessibus sputa candida, spumantia, cum saliva permista, alias cineracea, aut subnigrantia observavit *Aræteus* l. 1. de sign. & caus. diut. morb. c. 10. Nec id mirum, quum puris colorem nativum cinericeum credat *Galenus* Comm. in l. 2. Hipp. de Fract. ubi & accuratius docet, quo modo is oriatur. Eadem ratione sanguis in li-

D

gatu-



gatura Bilfiana, vel in candidum corrumpitur, vel nonnihil lactescit, sine chyli commercio manifesto. Efficiens causa præsto est, calor nempe, in hac tortura auctus & constrictus: materialis quoq;, ipse sanguis, ex quo vel putrefacto extra vasa, pus album nascitur, vel fermentato & per partes ex quibus constat, separato in ipsis vasis, & ex eo floridissimo (*Sanguine enim floridissimo mea editio Hafnienfis prima nitet, quæ semper emendatior*) candidus liquor, quem pro lacteo chylo æstimamus, quo abundat sanguis etiam maximè sanus seu floridus, quamquam illi accuratè sit permixtus. Non jam amplius locum habet Doctissimi cætera L. Dureti in Coac. commentum, quod materia chylosa nusquam sit nisi in ventriculo & tenuibus intestinis, adeoq;, nec alibi generari lumbricos. In ipso sanguine chylus quoq;, leviter in corde prima circulatione tantum immutatus, continetur, qui, si per calorem in ligato cane separetur, cinericeumq; sanguinem in meseraicis venis conficiat, non utiq; ex intestinis immediata via transit. Cur ea Tibi, Vir acutissime, minus arrideant, non perspicio, quum singula pro se auctoritatem magnorum Virorum habeant, & experi-

experientiam fallere nesciam. Cur sanguis, cum in vasis diutius moratur, albescat, inquit *Galenus* l. 14. de *Us. Part. c. 10.* & in libris de *Facultatibus Naturalibus*. Ex ipsis venis candidum sanguinem fluxisse, pluribus demonstravi in *Hist. de Lact. Thor. c. 13.* & in *Centurijs Historiarum*. Idem postea aliis observatum. Ut *P. Borellum* Cent. 1. obs. 25. præteream, unus jam sufficit *Rhodius* cujus gratum mihi semper nomen. Is Cent. 1. Obs. 36. in sacerdote vidit cum *Prævotio*, sanguinem in *Tertiana* duplici è *salvatella* secundum extractum plane album. Idem Cent. 3. Obs. 32. annotat *Sylvaticus* jubente puellæ suppressis mensibus in syncho sanguinem ter missum semper lacteum comparuisse. Apud eundem Uxori Centurionis in *Cantabria* puerum lactanti, quum febre continua laboraret, aperta basilica merum lac effluxisse notavit *Petrus á Castro* Medicus exercitatus, quod morbo per sudorem soluto in mammas redijt. Lac autem fuisse, non puitam, coagulo fuit compertum. Quod natura ipsa secernit in corpore, extra corpus per tepes centem aquam Medici efficiunt. Ita *Fernelius* l. 2. Meth. Med. c. 17. sanguinem crassiores in imo aquæ tepentis subsiden-

rem pro puro & secundum naturam esse judicat, si lucidus, tenuis, subalbidus, & co-hærens fuerit. Ut de nihilo non sit artificium istius, de quo Cl. *Schneiderus* memorat, qui insperfo pulvere, sanguinem à lacte separavit, ut utrumq; seorsum appareret. Quod natura tentat, imitatur quandoq; Ars haud infeliciter. Nonnunquam separantur in corpore vivente, ut nuper dictum, & *Barrolettus* l. 4. Meth. de diff. Resp. part. 3. c. 3. in pulmonum defectu advertit, quem in *Spicilegio Secundo* c. 2. laudavimus. Quo referenda Magni *Hippocratis* in Pherecyda exsereatio alba, lactea l. 7. Epid. in quo tam impermixti erant humores alimentarij, ut nono die plurimus circa frontem sudor obortus sit colore admodum albo, quem de chylo si interpreteris, nullius offensas incurres. Multa enim observavit *Hippocrates*, quorum rationem temporis injuriâ ignoravit. Nec manes illius irritabuntur, si ex nostris recentiorumq; inventis illum illustraverimus. Utar in hanc rem similitudine divini *Platonis* Dial. v l. de Legibus: Si quis pulcherrimum animal pingere voluerit, quod non ad pejus, sed ad melius futuro semper tempore progrediatur, nonne vides

cum

cum mortalis sit, nisi aliquem artis successorem reliquerit, qui si quid vel tempore ex animali abolitum fuerit, instaurare, vel per imbecillitatem artis ab artifice prætermissum adjicere possit, atq; ita fulgentius in dies animal reddere, laboriosum illud opus paucò tempore duraturum? Idem de medicæ artis subjecto, pulcherrimo animalium homine quoq; dictum puta. Amicissimus nobis & Naturæ fautor D. *Joel Langelottus*, Archiater Gottorpianus optimè meritus, nuper per litteras monuit observasse se ex corpore Equitum Magistri Baronis de Heiden, sub legione Qvastianâ in pugna Fionensi 1659. circa mediam dorsi vertebam sclopeto vulnerati, copiosum albicantem humorem effluxisse, per intervalla continuatum, & tandem adeò invaluisse fluxum ut non solum lintea quintuplicia, indusium, lodicesq; imbuerit, sed lumbos quoq; inundaverit. Pro liquore chyloso hunc habuit Vir laudatus, à sanie & ichoribus planè diversum, destinatum verò ad totius nutritionem, inordinatâ hac viâ profluentem, quando quidem æger benè appeteret, cibisq; eucnymis & delicatissimis uteretur, corpus tamen indices magis magisq; contabesceret.

Apertum cadaver demortui, pulmones monstrabat ea parte, qua vulnus inflictum fuerat, putredinem insignem concepisse, alioqui suspicarer lacteum thoracicum initio fuisse læsum, indeq; chylosum ex vulnere fluxum emanasse. Hinc æstimandum lotium candidum & lacteum, de quo *Theophilus* lib. de Urin. c. 5. cruditatem malumq; exitum indicare asserit, quia causam vehementem prodit, quæ à sanguine chylum separet, vel, si præter naturam vel dilatata sint lactea vasa admittantq; chyli ab his transitum ad renes, quod nos alibi credidimus, vel si inferantur venæ lacteæ in truncum cavæ, quod fieri suspicatur *Riolanus* in Annot. ad lib. 6. *Encheirid. Anat.* ult. edit. Paris. in lacteis urinis nulla in renibus exstante purulencia, utrobique defraudato alimento, cruditatem & atrophiam inducit. Nuperrimè Romæ *Io. Trullus* Chiron redivivus observavit, sicut in literis ad Excellentissimum nostrum D. *Henricum à Moinichen* testatur, in cruditissimo *Luca Holstenio*, quem rebus humanis exemptum orbis doctior deplorat, tabe renis utriusq; laborante, chylum impermixtum sanguini, copiosum cum lotio copioso effusum.

Tu veró porró, mi *Deusingi*, succum  
illum

illum cinericeum, qui in venis mesaraicis post ligaturam arteriarum reperitur, ut Bilianas partes tucaris, separas ac distinguis à lactis substantia, quia succus ille instar vitri fusi se habeat, & soli expositus indurescat instar vitri ab igne remoti ac refrigerantis, quod de lacte vel diutissimè in radijs solaribus detento non similiter verum est. Egregium factum, quo & *Bilsius* & Tu causâ cades. Eodem ego argumento in *Spicilegio* Bilsum oppugnavi, demonstraviq; ex lactis natura, quod cinereus ille succus non sit chylus. Si enim chylus esset, non posset vitri in morem concreescere. Iam quia ex observatione. Biliana succus ille, sanguinis instar, exsiccatus indurescit, splendetq; ut vitrum, utiq; sanguis erit non chylus, nec lacteam materiam secum vehet, quam observavi etiam diutissimè soli expositam nunquam vitri instar concreescere. Quo certior essem, lactis magnam partem sanguine paucopermistam in pelvi diutius solis radijs exposui. Vix longâ mora impetravi massam siccam, minimè splendentem, sed friabilem, subobscuriq; coloris, quæ affuso liquore vini, lixivio similis emerfit, quo super carbones exhalante, sal subfuscum remansit, cui

iterum aceto affuso, cinericeus demum color affulsit. Non existimo, chylum Te á lacte separaturum, aliqui cum propria umbra luctaberis. Dubitare hic videris, sed mox pedem retrahis á *Bilsio*, eo quod omnino plurimum alimentariæ substantiæ eidem lacti, seu Rori, quem solum lactis nomine dignatur, subesse agnoscas, secus ac *Bilsio* vitum, quem etiam in hoc passu deserit *Zasius*. Ros certe ille in ductu Thoracico tam candidat, tempore distributionis alimentorum, quam chylus in mesaraicis, nec ullam video inter utrumq; liquorem differentiam, si locum recipientem exceperis. Eadem promptitudine lacteus chylus ex ductu thoracico, sanguini in axillaribus mixtus, in sanguinem mutari potest, quam vester chylus, proprie ita vobis dictus. Nullam utriusq; liquoris differentiam in cuniculis deprehendit dignus Te præceptore discipulus *Anthonyus Everhardi*, qui lib. de Hom. & Brut. Exortu, in cuniculis lacteam hanc materiam per lacteas venas ad omnes corporis partes distribui vidit pro illarum nutritione. Cum alimentarium succum neget, cur Rorem appellaverit *Bilsius*, ignorare cogor. Omnis ros candidans, nutrimentum esse potest, qualem est

Man-

Manna, lac illud ex arbore Quest, ut loquitur *Garcias ab Horto* l. 1. Hist. Arom. c. 11. quod egregie illustras in mellea tua *De Manna* Dissertatione. Nutritioni aptissimum esse hunc rorem, Manna Israelitarum fidem facit *Exod.* XVI. *Num.* XI. Et quanquam evanescente lacteo colore roscidus succedat aqueusq; is tamen ex lymphâ allabente diluitur, quod Chylo in metereicis lacteis contento quoq; evenit. Non ideo lacti chyloso suum subtrahendum vas, nec primaria ex lacte vasis appellatio, præsertim quum purum esse rorem aqueum in ductu thoracico irrorandis partibus tantum destinatum sine nutritione, & color candidus sæpe ibidem multorum oculis visus impugnet, & vos rectè pernegatis. Ludat ille in Roris nomenclaturâ, nos interea certi sumus, candidum hunc esse rorem, qui per thoracicum ductum distribuendus decurrit, & rorem hunc candidum non minus nutritioni partium à Natura destinari, quam vel mannam Israelitarum, vel rorem communem, quo absorpto æquè ali arbores ac per radices, asserit Naturæ amassius *Harvejus* l. de Gen. Anim. Ex 10. sed linquamus illi suum cum glandibus rorem, puramq; aquam, modo Tu nobiscum lacte ve-



scaris, candidus sis, & lacteam dicendi ubertatem candore tuo illustres.

His aliisque prætermittis, quibus Hepati reducendo & à veterino resuscitando doctissimè defatigaris, meque ad obsequium domini pristini conaris referre, amicaque manu adjuvas, tandem ad caput ipsum negotij progrederis, Hepatisque usum à nobis cum *Peiqueto* admissum destruis, ut in plena pristinae dignitatis possessione Hepar tuum operam restituatur. Et Hepati & mihi gratulabor, si Te voti tui compotem Naturae facilitas & diffusa eruditio reddiderit. Illi quidem, quod tali Æsculapio reviviscat, mihi verò, quod à tanto Viro in viam reducar. Non invitus fidelitatis juramento me inter primos obstringam, crimenque læsi principatus hætenus admissum, submisit deprecabor. Haud ullo in genere venia est justior, si modo, quod *Plinius* l. 3. inculcat, minimè mirum est, hominem genitum non omnia humana novisse. Valdè tamen metuo ne in cassum labores, operamque perdas & oleum in illo excitando, qui profundo somno non tam immersus quam planè submersus. Ingentem interim conatum deprædico, quod tot laboribus & vigilijs partam eruditionem & varie

variæ doctrinæ usum in salvando viscere nobilissimo impendas. Si successerit institutum, à jecinore gratias, à corpore universo laudem, ab omnibus qui corpori suo favent ejusq; incolumitati & incremento, immortalitatem famæ consequeris, quæ quanquam hæctenus editis monumentis præciatis & obitibus in illustribus Cathedris munitis abunde sis consequutus, hæc tamen quæcumq; accessione testaberis, nihil magnæ famæ magis incumbere, quam de omnibus benè mereri. Hoc animo tuam Epistolam legi, eodem conatibus tuis applaudo, & amice respondeo. Veniam tamen dabis facilem, quod illis subscribere non auserim, quæ vel evidente sensu vel certâ ratione destituuntur. Omnem assensum sanctè Tibi polliceor, quandocunq; infallibili oculorum testimonio & indubijs rationibus convictus fuero. Naturæ enim & veritati sacramentum dixi, nec mea refert, an Hepar primas in sanguine conficiendo partes tentat, an Cor. Pacatiora erant nobis tempora sub imperio Divi Hepatis, quanquam injusto. Mutatio omnis periculosa, inprimis in Rebus publicis, quarum mutationes, etiam à peioribus ad meliora, raro sine detrimento aut turbis fiunt, quæ  
ut

ut evitentur, sæpe videmus meliora probamusq; , deteriora sequimur. Utinam redeant secula illa tranquilla, quibus sub auspicijs Iecoris, mortales per antiquam tritamq; semitam grassabantur. Iam mutata rerum facie Cor Princeps oeconomiae Animalis invaluit, sed cordati nos esse desivimus. Alij suam sortem deplorent, mihi certè mutatio ista & bonorum & famae fere dispendio stetit. Fluxit nobis antea lactis ubertas, at cum Lymphaticis Vasis, diligentiae nostrae publiciq; amoris testibus, pleno gurgite aqua successit, ut penè cum indoctis *Scaligeri* Grammaticis vinum limphatum bibere cogamur. Cordis patrocinium tam ferax mihi fuit inimicorum, qui protervè in famam meam debacchati sunt, ut securius sub minoris Hepatis vixerim clientelâ, quam sub magni corporis humani Monarchae dominatu. Unum tamen solabitur temporum aduersitates, quanquam cum Lymphaticis vasis cordisq; imperio decreverit Peculium, & fama apud invidos nonnihil sit detrita, mihiq; ipsi displiceam, fortis melioris spe decollatâ; posteris tamen, bonisq; rerum aestimatoribus, inter quos Te numero, documentum ero, quanti quisq; fortunam suam prae publicâ inno-

innocentia & naturæ veritate debeat æstimare. Verissimè enim *Plato* Epist. 2. ad *Dionisium*, probatissimos viros cuncta facere, quo in futuris seculis bene inter homines audiant. Pro comperto habeas, non aliam me ad Hepatis funus causam impulisse, quam veritatem, utriq; addictam, neutiquam novandi studium aut seditionis amorem, aut lucri cupidinem in hujusmodi mutationibus usitatam. Res ipsa pro me loquitur, ut vel inimico judici, sed erudito & sincero, approbari possem. Spondeo denuò, nunquam me obfirmaturum animum, si pro Hepate quicquam obtinueris. Nondum persuadere me potuerunt *Bilsiana* experimenta, quæ Te tuumq; assensum vicerunt. Probavi enim pronuptam certam non esse, quin dubitandi relinquunt causas & maximam partem ex invidiâ ab ipso esse suppressa, ut firmum de non visis iudicium ferretur impossibile. Chylus certè corporeis, oculis in venis mesaraicis neutiquam à *Bilsio* exhibetur videndus, sicut refert, sed ratione & conjecturâ investigatur, quia cinericeus est ibidem sanguis & subfuscus, quem colorem, quia proprius non est chyli, nec consuetus, aliunde sanguini posse advenire in

in loco demonstravi, & ex notioribus explicavi, memor *Pauli ff de divers. Reg. Jur. t. 14*: in obscuris inspiciendum esse quid verosimilius, vel quid plerumq; fieri soleat. Urges: Cur non in alijs partibus æquè sanguis in succum cineritium convertitur, durante ligatura, quam in mesentericis venis. Verbo respondeo, quia forsan in alijs partibus ligaturam istam eo modo, ea mora non administristis. Deinde alibi ille sanguinis faculenti & ad mutationem hanc apti confluxus non est, nec mistura ea sanguinis ex liene, mesenterio, pancreate, intestinis, ventriculo, omento, alijsq; partibus quæ portæ ramos recipiunt vel emittunt. Si rectè morborum calculum ponas, multi illi variiq; ex hypochondrijs pullulant, qui alijs partibus communes non sunt, eo quod abdomen plurimarum affectionum mater sit, ob varia excrementorum genera, ob varia varij sanguinis vitia huicq; regioni ferè propria, quæ nunc non repero, ne Tibi mihiq; sim molestus, quanquam & cinericeum istum colorem alijs competere superiori occasione exposuerim, & talem alibi quoq; esse sanguinem, qualis in his venis mesaraicis, vix sit dubitandum. Paucis data per Te commoditate

tate ad Hepatis officium progrediar, ne quidquam eorum omisſiſſe videar, quod ſcrupulum movere ſolutione dignum poſſit in erudita Tua Diſſertatione Epiſtolica.

Inventis per DEi & Naturæ gratiam Vaſis Lymphaticis, eo loco prope Hepar, quo alias lactæ Afellianæ chylum hepatis ad ſanguificationem inferre putabantur, percussit illico inviſa res animum ſic ſatis veteribus addiſtum, dubitaviq; quid de Hepate ejusq; officio antiquo tandem fieret, ſi quidem nullæ lactæ venæ ad Hepar pertingerent, & quæ hætenus pro lacteis habitæ fuerant, eſſent vaſa nova, quæ Lympham ſuam ex Hepate efferrent, quemadmodum per ligaturas docebamur, quicquid jam in contrarium obvertant Biſſiani contra fidem oculorum, quia ex *Galeno* l. de Marcor. c. 2. non didicerunt, ſophiſtarum morem eſſe contra experientiam loqui. De meſeraicis venis nulla ſubiſt cogitatio, in quibus maniſeſto ſenſu nunquam ullus chylus comparuit. Igitur quum de Naturæ veritate & ſalute pariter Hepatis ſollicitus eſſem, ne fruſtra conſtitum magna providi creatoris injuria exiſtimaretur, in officio à Cl. *Pecqueto* ipſi aſſignato acquievi, nempe neutiquam ſanguinem ex chyl

chylo conficere, sed confectum depurare & à bile instar colatorij secernere. Unde liquet contra rigidam clarissimorum Virorum censuram, qua mente, quoque sensu Epitaphium tumulato lecori erexerim. Non quod in corpore deficiat, aut abesse possit. Hac necessitate lienem antevertit, quem cursoribus olim exemptum *Plinius* author est l. ii, c. 37. Homini exsectum semel annotat *Fioravanzius* in Sicilia. In Anglia canibus, felibus, suis innoxie adimitur. Nuper hic Hafniæ in præsentia serenissimæ Reg. Majestatis binis canibus, minori primum, mox majori à Chirurgo Regio Philippo lien celeri manu & cultro ademptus fuit. Supervixit minor, & jam optime convaluit, commodeq; liene caret, at alter major, biduum non attigit, forsan quod vel diutius ante sectionem esset vinculis in scamno ferali constrictus, vel quod lien illi esset major, adeoque vasorum ligatura perennis non esset, spithamam enim unam cum media ferè longitudine æquabat. Quamquam verò excindatur lien, non ideo tamen per naturam abesse potest, sicut nec uterus, nec brachium, nec quævis alia pars, quæ subinde resecatur, commodè deficit, sed absentis interea officio defungitur vel hepar, vel

vel pancreas. Hepatis verò majorem necessitatem putavi, quam ut universum tumularetur. Nec ideò exsequias illius celebravi, quod omni prorsus munere privatum ferietur; sed quia principe sanguificandi officio excidit, sicut apertè indicant quæ de hoc argumento hætenus commentatus sum. Strenuè pro antiqua illius dignitate pugnavit veteranus in arte nostra *Riolanus*, aliq; non pauci, quorum rationibus, nisi fallor, abundè satis feci. Tu, Vir eruditissime, alia rem aggredieris via, & ex *Bilsianis* principiis confectum pro Hepar antiquo negocium existimas, nebulasq; discutere conaris & hic & in *Exerc. de Sanguif.* quibus nostrorum oculorum vitio Hepar deliquim passum est.

Scilicet perperam in venis lacteis chylum quæsitum suspicaris, quod *alibi sub sanguinis purpurâ velatus, oculos fugiens per aliam viam, nempe venas mesaraicas, in Hepar deferatur.* Ipsum te hoc paragrapho oppugnas. Si oculos fugit chylus, quæ veritate asseris à *Bilsio* evidenti experimento & corporeis oculis visum esse in mesaraicis chylum. Si oculos fugit, quæ certitudine illos oppugnas, qui illa sequuntur & tuentur, quæ oculos non fugiunt? De occultis non judicat Ecclesia, nec



Anatomia. Sicut Iuris Consulto turpe censetur sine lege loqui, ita & Anatomico indignum est, sine evidenti experimento vel nova proferre, vel defendere. Rectius nos in venis lacteis solis quærivimus, quæ ad oculum patent, quam vos, quæ oculis se subducunt & ratione qualicunq; vel conjecturâ in lassis lactibus, ut cum *Plauto* loquar. Nos certi ex ijs quæ vidimus, vos ex invisis incerti. Opinior ex conjecturis, ex sensibus veritas oritur, quorum illa, teste *Hippocrate* in *Lege*, ignorationem parit, hæc scientiam. Hinc æquam meam conditionem *Zassio* oblatam reputa, quod velim illi credere, si ex Magistri sui compromisso per manifestas vias lacteas mihi ad Hepar chylum perduxerit; quæ enim de venis melaraicis promit in defensionem illius, me non movent, quia occulta sunt, neutrius oculis conspicua, & meræ conjecturæ, ex quibus nulla ars nisi apud imperitos conficitur. Rectè quippe *Polus* ait apud *Aristotelem* l. 1. *Metaph.* c. 1: experientiam efficere artem, imperitiam verò casum.

Deinde nequaquam rationi consentaneum videtur Tibi, alimentarium succum in Hepar infusum, nil in eodem concoctionis subire, nil elaborationis sustinere in calido viscere, eoq; peramplo.

Nisi

Nisi erro, sub succo alimentario anguis latet quem de chylo si interpreteris, eundemq; ex intestinis ad Hepar immediate traduci oculatâ fide demonstraveris, tecum sentiam concoctionem aliquam & elaborationem ibidem subire. At si de sanguine sit sermo, nego concoctionem novam ibidem sustinere, quia primò, ante concoctus fuit in corde quam ad Hepar deveniret; deinde cavitas nulla sufficiens est, in qua concoqui possit. Si ordine omnium concoctionum in corpore officinas percurras, nullam invenies quæ manifesta careat & capaci cavitate, in qua tanquam in olla fermentationem concoctionemq; promoveat Natura. Ventriculum, cor, cerebri ventriculos etc. in dictorum fidem acclamo. Non nego elaborationem aliquam alibi & hic quoq; fieri posse, sed illa est proprii alimenti. Calidum viscus & per amplum separandæ bili erat necessarium; quæ, ut loquitur *Democritus*, in omni quidem natura inest, sed in aliis quidem minus, in aliis verò copiosius. Pro copia igitur bilis fecerendæ nativa hepatis amplitudo variat. Hincq; aucto ex bile copiosa calore, jecinora increscunt. Sua ætate fæminam grandævam vidit Parens C. *Gemma* l. i, *Colmocrit*.

c. 6. quæ ne ad momentum quidem absq; ingestione ciborum & potuum vivere potuit. Caloris bilisq; exsuperantiâ tantum cibi potusq; desiderium indicat, unde qvum in hujus modi copiosa bilis & in corpore sit & generetur, vastum **hepar** est necessarium, quale quoq; in aperto defunctæ istius femina cadavere inventum fuit, integrum, turgidum sanguine spirituq; impensusq; rubens ac mole ineffabili, ut sola scilicet magnitudine membra spiritalia & cõterminas partes oppresserit.

Præterea à ratione alienum videri credis, **hepar pondus inutile, merumq; colatorium habendum, qvum ad simplicem percolationem nequaquam tanto visceris parenchymate naturæ fuisset opus.** Sed, mi Deusingi ex tua ipsius confessione *Exerc. de Alim. Depur.* § 60. est naturale colum pro hepatis liquoribus, inprimis bile percolanda, ut adeo, quanquam merum sit colatorium, pondus ideo inutile dici nequeat. Satagie rerum suarum, si ex naturæ instituto & œconomia animalis comodo, hoc solo officio defungatur, magnoq; visceris apparatu opus habet, ut in particulis magnitudine ac figurâ diversis, (utor verbis tuis) porulos habeat magnitudine  
item

item, figurâ situq; diversissimos; quorum alij miscellam variorum in massa sanguinea humorum per truncum venæ portæ ac propagines promiscuè admittunt; alij ex eadem sanguinis miscella bilem suscipiunt, eandem in canalem & porum biliarium transmittunt, alij deniq; purificatum à bile sanguinem admittunt, transmittuntq; in extremitates capillares venæ cavæ. Tot actiones diversæ, diversarumq; actionum particula, amplum visceris instrumentum postulant. Non minus ad simplicem percolationem suum parenchyma requirebat Hepar, quam lien ad succum acidum. Nec major illius quam hujus est eo passu dignitas, nec nobilius parenchymatis officium. Lien notum hepar olim dicebatur, quod similes utriusq; essent actiones, ob viscerum similitudinem & loci affinitatem, ut sicut lienis parenchyma sanguinem ab acido succo liberat, vel illum huic miscet, ita & hepar succi flavi commercio vel liberetur vel jungatur, in quem finem utriq; suum vas excretorium adjacet, huic vesicula fellea, illi ductus pancreaticus. Unde & similes morbos utrumq; ferè viscus patitur, quod simili dicatum actioni existimetur, & Hepaticum morbum cum spleneticò

apud *Hippocratem* libb. de Morb. conjunctum legimus, morborumq; utriusq; partis permutationes, utriusq; Regius morbus, utriusq; per ruborem significationes ibidem in *Epidemijs* recensentur. Ad rem nostram *Galenus* l. 6. de Loc. Aff. c. 1: Splen habet multa accidentia cum hepate communia, illa nulla re differre videntur nisi quod quædam magis, quædam minus alterutri evenire solent. Tanta moles requirebatur, ut primò sufficiens fieret biliosi succi percolatio, deinde ut accurata; utrumq; verò, ne restitans in sanguine bilis vel calorem præter naturalem accenderet, vel fædo cutem colore inficeret. Destruit Hepatis officium à vobis propugnatum, ipsa Hepatis conformatio, cui nullam idoneam cavitatem insculpsit primus plastes, imò quod nullo alio sanguinis colore subinde inficitur, præter biliosum. Lampetræ enim jecur viride invenit *Bronzerus*, dubio præcul ab æruginosa bile, & *Rhodus* noster, Musarum delictum, Cent. 3. Obs. 20. Patavij in juvene ictero diuturno extincto universum jecur observavit viride, qualem colorem assiduo herbarum ac biliosorum esu adscribit idem Vir summus, quum potius vitium hepatis incusari debeat, quod ab officio cola-

colatorio cessans, bile coacervata intra se, bile immersum deturpabatur. Valde officit vestræ sententiæ, quod Hepar antequam sanguinem possit conficere, unice occupetur in bilis separatione ab alimento foetus. Docet id observatio *Harvej*. De Gen. Anim. Excercit. 22. vobis quoq; juxta mecum cognita, qui fel virescens intra hepatis lobos inveniri tradit, antequam hepar colorem sanguineum nanciscitur. Individua utriusq; videtur copula, ut nullum unquam Hepar reperiatur, quod fel non habeat, quanquam subinde viscus ipsum vel sanguine vel ejus tinctura destituatur. Deniq; si antiquitatis consensu à suscepta opinione dimoveri vos patiamini, *Galenum* audite, vobis antea lectum & laudatum, qui Lib. de Theriaca ad Pison. cap. 16. ex usu Theriacæ jecur promptè bilem secerne prædixit, nullâ sanguinis factâ mentione, cujus productionem venis ibidem attribuit, neutiquam hepati, à quo defecatum sanguinem cor suscipiat. Contra receptam de Hepatis usu sententiam, præter alia alibi signata, unam experientiam afferam antequam hinc digrediar. Hisce diebus Consultationi cum Medicis Experientiâ & eruditione inlytis D. *Paulo Mothio*, & D. *Christiano*

*Ostenfeld* Amicis meis & Collegis æstimandis  
interfui, pro Nobili Matrona XXXII. anno-  
rum, quæ altero jam anno gravida creditur  
ab obstetrice imperita, revera tamen hepatis  
adeo vasti, ut universum abdomen in in-  
gentem molem distendatur, scirrho labo-  
rat, optimè tamen valet, nisi quod expedi-  
tus non sit ingressus, plethorica est, cibum  
bene appetit & concoquit, universo habitu  
sana, corpulenta & sanguinem bonum con-  
ficere videtur. Nisi grave tibi sit, hanc ad  
animum historiam revoca, ut concedas in  
hepate primam præcipuamq; non esse quæ-  
rendam sanguinis conficiendi officinam,  
alioqui hæc nobilissima Matrona jam atro-  
phia emarcuisset, quam, meo judicio, tam  
diu evitabit, donec pondere incrementis vi-  
sceris Receptaculum lacteum, venæq; lacte-  
æ, compressæ fuerint, ut per ductum tho-  
racicum chyli via ad Cor intercipiatur, vel  
si mole tandem parenchymatis hepatis vasa  
hepatica bilisq; percolatoria conciderint,  
cachexiam aliaq; sequutura mala incurrat,  
quæ ex obstructione harum partium solent  
evenire. Sed quanquam ex voto vestro suc-  
cederet contra me hæc disputatio, non ideo  
tamen Hepar vel servatum erit, vel in pristi-  
na

na dignitate restitutum. Quamvis enim bili separandæ destinatum non sit, non ideo tamen sanguinem conficit, quum plures aliæ sint actiones, quibus accingi potest. Displicet quippe ille idem Hepatis usus Celeberrimo & Expertissimo D. *Francisco Sylvio*, veteri meo amico summè honorando; unde *Disp. Med. Sext de Bil. & Hep. Us. th. 48.* inservire crediti. continendis, firmandisq; teneris venæ cavæ, ut & Portæ Venæ ramis, una cum Biliarijs Ductibus Hepaticis intra Communem Vaginam conclusis, & in capillares propagines discerptis; 2. ut parenchymatis sui blando motu promoveat bilis & sanguinis per venas prædictas refluentis permissionem, Sanguificationi tamen adversatur Vir naturæ consultissimus, quam nobiscum Hepati detrahit, Bilsianæ hæreseos strenuus hostis, ut quæ hoc in passu de Hepate statuimus, neq; Clotho revolvat denuo, neq; Atropos immutet.

Tandem tamen ut pro *Biliso* evincas contra *Spicilegij* nostri *Secundi* argumentum sextum, sanguinem in cava prope Cor non ideo puriorem esse illo qui in venâ portæ continetur, quia in hepate depuratus fuit ex meâ responsione, negas bilem in hepate se-



gregatam tam insignem non modò in colore, sed & in substantiæ modo diversitatem massæ sanguineæ inferre, ut infra Hepar in vena portæ reperiatur densi & obscuri coloris substantiæq; succus, ex observatione Biliana, ille verò qui Hepar transit in vena cava jam limpidus & rubicundus inveniatur. Sed salva res est, quia in Hepate depuratur multiplex concurrens sanguis ex arteria Cæliaca & vena portæ ejusq; ramis splenico & mesenterico, qui ex recurſu nutritarum partium sordidarum evanidus quasi, torpens & turbidus in Hepate filtratur, depositisq; fæcibus clarior ad venam cavam properat, & adscito in societatem sanguine cæliaco arterioso, rubicundior progreditur. Ex principiis Sylvianis res quoq; est clara & expedita, siquidem ex admista in Hepate, bile sanguis fit fluidior & tenuior, quod nec pîctores ignorant, qui felle utuntur ut fluidos colores reddant. Dubitas igitur justis de causis, Vir doctissime, an non à bile tenuior sit substantia? Forſan, si à bile pura. In hepate autem alijs est permista, in primis sero, quod in Hepate quoq; separatur & per lymphæ ductus expurgatur. Ita apud Hippocratem l. 1. de Morb. à bile & pituita ad vesicam confl-

fluente, crassa urina redditur. Ex ejusdem  
 Coi alioqui doctrina, á bile turbantur hu-  
 mores in corpore. Hinc bile ad caput dela-  
 to, urinæ claræ in *Aphorismis*, & malæ in  
*Coacis* & l. 3. *Epid.* ægr. 4. & dolor capitis ex  
 bile sedatur ubi urinam crassam reddiderit l.  
 2. de Morb. & l. 3. *Epid.* In morbo Regio  
 urina est crassa & biliosa, quod quotidie ex-  
 perimur in Ictericorum visitatione, annota-  
 vitq; ante Hippocrates lib. 2. de Morb. & in  
 febre quoq; ex bile, *Ibidem*. Quamquam in  
 Hepate nulla melancholici succi fiat separa-  
 tio ex liene delati, secus ac veteribus placuit,  
 tamen & succus ille lienis, quo infectus est  
 sanguis in hepate depurandus, liquidior se-  
 rosiorq; ex *Hippocratis* doctrina, acido succo  
 imprægnatus, separatione in Hepate indiget,  
 & expurgatione per vasa Lymphatica, dum  
 biliosus per canalem biliarium excernitur.  
 Ex his veró humiditatibus varij generis ex va-  
 rijs partibus alvinis confluentibus, quintur-  
 bidus evadat sanguis portæ infra Hepar, du-  
 bitari non potest, & tales liquores miscenti-  
 bus apparebit, ut ad chyli miscelam confu-  
 gere nulla cogamur necessitate, qui minus  
 turbat & obfuscet sanguinem quam serosa  
 acidaq; lienis colluvies. Miror profectó cur  
 chy-

chylum candicantem, appelles obscuriorem & turbidiorem succum. Lucis misturam habet color candidus, si quidem pateris id de chylo & lacte dici. Differentiam enim eruditi constituunt inter candidum & album, illud est quod quadam nitenti luce perfunditur, hoc pallori vicinum, sicut recte monet *Phil. lac. Maussacus* Animadv. ad Hist. Animal. Scal. ad p. 256. Candidus hac significatione est chylus, si vitri in morem concreseat & splendeat ex *Bilsi* observationibus. At lac ipsum, quia purius chyloque perfectius, candore illustri magis omne coruscat; fabulæ enim vicinam esse credo *Plinij* narrationem l. 2. c. 103. equas in campis Ponti à fluviò Astaces rigatis pastas, nigro lacte gentem alere. Tantum igitur abest sanguis mesentericus admisto chylo albo reddatur obscurior, ut potius illustrior fiat, si quidem, de quo valde dubito, amicé inter se uterque humor in mclaraicis venis concurrat. Affirmare ausim tam ibidem amicé non convenire, quam nos in hac pagina de Hepatis fato velut in Areopago deliberaturos. Mortuum ego existimavi & antiquo sanguinis munere defunctum, Tu alto sopore tantum obdormivisse, subductumque ad tempus oculis

lis mortalium. Male sit hujusmodi Endymioni, qui protracto in plusculos annos stertore, mortuo similis à necessario officio quiescit, sed Tibi bene sit, qui aurem vellucas. Valde tamen metuo, quanquam & tuam in gratiam & antiqui muneris recordatione, optima illi quæq; precarer, ne eadem facilitate ex mortuis resurgat, qua somnum excutiat, mortis imaginem. Adeo ut una utriq; mens sit, una voluntas in sorte Hepatis definienda, quam ego inter mortuos, Tu in somno morti simillino quæris.

Aliorum interim curiosas artes rideo, quæ pacem funeri denegantes, ex busto resodere conantur & à rogo referre, majori spe quam successu. Noverca Hepati fuit Natura, quod genere sexuq; brutorum censeatur, quibus nec à brevi morte resurgendi datur potestas, quicquid deniq; pro restituendo spiritu laborent vespillones. Quicumq; in hoc pulvere desudant, similes mihi videntur Pythonissæ in Endor, quæ Samuelem defunctum rogatu Saulis olim ex tumulo reducere tentavit l. *Sam.* 28. Quum enim omnia tentasset, non verum Samuelem, sed vel umbram ejus tantum & spectrum eduxit, quemadmodum præter alios evincunt *Anania De Nat.*

Da.

Dæmon. l. 3. *Vierus* l. 2. de Præstig. Dæm. c. 9. l. G. *Godelmannus* l. 1. de Necromant. c. 4. aliiq; vel eduxisse simulavit, sicq; timidum Regem novo spectaculo inhiantem pessimè delusit. Inquieti sunt Hepatis manes, & terra gravis, quia injusta fuerat alieni dominij usurpatio, nec ideo facile sine spectris tumultus illius aditur, quæ si pro vero Hepate accipimus, eoq; redivivo, egregiè fallimur, & velut ab igne fatuo, in cœmiterijs defunctorum oberrante, seducimur ad avia. Fateor spectra hujus modi vera corpora mentiri posse, & quadam similitudine imitari, sed tandem dolus fit manifestus, imprimis si convivia & execrationes successerint. In quam rem Tibi ex *Georgio Sabino* Peuceri affine in Comm. l. 10. Ovid. *Metamorph.* hanc historiam recitabo, partim ut gratâ jucundaq; varietate longioris Epistolæ tædium leniam, partim ut alij exemplum habeant, quo territi à convitijs abstineant, qui resuscitando Hepati operam suam addixerunt. Fidem tamen meam hic non obstringam, ad authorem suum relegaturus quicquid dubium aliis videbitur. In Bavaria virum nobili familia natum, extincta uxore, tantum animi dolorem cepisse refert Sabinus, ut nullam admitteret consolationem.

lationem, ac vitam ageret in solitudine. Tandem ubi nullum finem lugendi faceret, uxorem ejus comparuisse, excitatam à mortuis, ac dixisse, se quidem semel confecisse curriculum vitæ à Natura datum, sed importunitate ipsius revocatam nunc esse in vitam, atq; à DEO jussam uti ejus adhuc consuetudine diutius, hac tamen conditione ac lege, ut matrimonium morte solutum denuo per sacerdotem solenni ritu jungeretur, utq; deinceps ipse abstineret blasphemis convitiandi verbis, quibus uti consueverat, se enim horum causa ei ademptam fuisse, atq; iterum excessuram é vita, cum primum ejus modi aliquod verbum edidisset. His actis, illam curasse rem domesticam, ut antea, & aliquot etiam peperisse liberos, semper tamen fuisse tristem ac pallidam. Post multos veró annos maritum vesperi potum, & ancillæ iratum, edidisse verba quæ non debebat: interea ipsam disparuisse é cubiculo, unde allatura erat poma, ac reliquisse muliebrem vestem, sine corpore stantem, quasi phantasma ad cistam ubi poma servabantur. Discant ex hoc Evestro, qui Hepatis partes cum aliorum contemptu & convitijs sequuntur, quam facile putaticium Hepar, tanta sollicitudine & moero-

moerore vindicatum & quasi ex inferis reductum, é manibus iterum elabatur & evanescat, pomaq; aurea & desideratae opes difflugiant, quando maledicis vocibus publico bono inservientes onerantur, & umbra rerum pro vero corpore admittitur vel evocatur. Quicquid alij vel peccent vel deludantur, certó credas nos non deludj, inter quos intemperate erit amicitia qualis inter bonos esse decet, sine convitijs aut ullius obtreptione, nec passurum me ut cum opinionum dissensu dissentiat quoq; voluntas & bené merendi studium, Tibi omni jure addictum. Volupe mihi semper fuit cum tui similibus literarum commercium exercere, quibus veritas placet ejusq; investigatio cum humanitate, quam, nisi fallor, nunquam in meo calamo desiderabis. Rusticos aliorum mores & inhumanos ad rus relegamus, ut cum bestiis pugnent & strenuè ibi pugnos exercent. Nec Hepati, nec cordi tam arcto obsequio me obstrinxi, ut eas propter mores honestos sedatosve exuerem. Nam Tros, Tyriusq; mihi nullo discrimine agetur. Plura non addo, ne prolixo scribendi officio Te tuumq; affectum videar fatigare. Levi calamo ea tetigi, quæ alicujus mo-

momenti esse existimavi in humanissima tua Dissertatione, neglectis cæteris minutijs quarum pondera exactam diligentiam non requirunt. Dumq; nonnullis resumendis calammum implevi, ne quidquam quod doctissimæ Tuæ pennæ excidit negligerem, præter opinionem vidi excrevisse responsionem, tuo potius honori quam colligendis quis quilijs dicatam. Quicquid omissum judicaveris, supplebit affectus & animus sine fūco. Vale, etiam publico nomine, ut defuncto Hepati terram levem precari mecum assuescas. Hafniae Cal. August. clō lōc lxi.

P. S. Dum moras nectit Bibliopola nostras in divulganda Dissertatione, experimenta occurrerunt nonnulla, quæ prioribus addi possunt, ut vel illustrentur vel confirmentur ea quæ contra Bilsum disputavimus. Tu, inclyte *Deusingi*, hæc expende, & nos ama Tibi faventes.

Pag. 13. l. 22. Nam judicat eruditus *Samuel Sorbierius* candidus lymphaticorum nostrorum præco, in Epist. gallic. ad Emin. Card. *Mazarinum*, Hepar culpa vacare, quod tantum sibi nunquam tribuit, quantum patroni illius, nescio qua adulatione, affinxerunt.



P. 26. l. ult. *Vincent. Slegelius* ex edit. *Blottesandæi* p. 12: Intercepi ego thoracicum filo ad vicina axillaris distributione nondum celebratâ, post aliquot horas facta distributio implevit lacteas omnes, tandem etiam thoracicum, duravitq; ille albicans color & lactearum distentio diem integrum à morte animalis.

P. 36. l. 6. Et *Theophilus Protospat. l. 4. de Fabr. Corp. c. 11. οχετὸς* vocet ductus narium in os per palatum ex toto cerebro supervacua evomentes, eosq; per *cloacas* reddat *Interpres Junius Paullus Crassus*: nam & per cloacas Romanorum aquæ ex urbe fluebant in Tiberim, teste *Strabone l. 5. Geogr. & Dionysio Halicarn. l. 3. Ant. Rom.* & per has fluvij, quasi montibus concavis clausi per ingentia stagna decurrebant apud *Cassiodorum l. 3. Var. Epist. 30.*

P. 47. l. 17. *Slegelius* apud *Blottesandum* pag. 15: Neq; ego in extispicio vivi canis ad leges Bilsianas dissecti & ad 4. à sectione horas viventis quicquam præter obscurum liquorem, sanguini reliquo planè gemellum, potui deprehendere.

Subcineritium colorem omni sanguini facile impresseris, si ad ignem in vase leviter

ter coquas, coctumq; ex intervallo examines: eluatur enim post coctionem aquâ tepidâ & plurimum subcineritij succi coagulati in eo deprehendes.

Cl. V. *Olaus Borrichius* Collega & amicus, nuper valido cane vivo secto, statuit quinq; vascula vitrea ordine, quibus infusus erat spiritus aceti, ol. sal. Tartari per deliqu. solutio aluminis, sp. salis armoniaci, spir: vini; in singula vitra ex arteriâ inguinali calentem sanguinem infudit, inspexit post intervallum, & plenius postridie omnia, observavitq; sanguinem, cui affusus erat spiritus aceti, redditum nigricantem instar sanguinis melancholicorum, sedimento crasso, copioso, atro, supernatantem liquorem pænectiam atrum; cui affusum ol: sal: Tartari, redditum coloris sic satis floridi, sed turbidiorem liquorem, sedimentum nullum, ramenta tantum fibrillarum instar hinc inde conspicua; cui affusa solutio aluminis, redditum instar putidæ & subcineritiæ putrilaginis, omni sanguinis colore prorsus abolito; cui affusus spiritus vini, redditum turbidiorem, quam cui ol: sal: Tartari; cui sp. sal. armoniaci, redditum omnium elegantissimum, colore floridum, substantia tenuem, in fundo sedi-